



册府元龟
卷之三十六
至八



13
849
15



門 4 3
冊 849
卷 15



冊府元龜

淮南李嗣京參閱

西極文翔鳳訂正

豫章黃國琦較釋

帝王部 三十六

封禪第二

唐高祖即位後公卿數請封禪龍朔一年十月癸丑
詔宜以四年正月有事於泰山所司詳求故實務從
折衷仍以來年二月幸東都
十二年戊申詔曰海東二蕃久愆職貢近者命帥薄

伐軍務事殷緣河州縣勞於征役比雖多有蠲免庶
事優矜萬邦俱會恐致煩擾勞逸二途理無兼遂介
丘大禮及幸都並宜且停

麟德元年七月丁未朔詔宜以三年正月式遵故實
有事於岱宗所司詳求茂典以從折衷其諸州都督
刺史以二年十二月便集嶽下諸王十月集東都緣
邊州府襟要之處不在集限天下諸州明揚才彥或
銷聲幽藪或藏器下僚並隨嶽牧舉送

九月乙丑詔曰來年行幸岱宗州縣不得浪有煩擾
其水淺可涉不可繕造橋梁所行之處亦勿開道路
諸州及寺觀并百姓不得輒獻食

二年十月丁卯帝發東都赴東嶽從駕文武兵士及
儀仗法物相繼數百里列營置幕彌亘郊原突厥于
闐波斯天竺國罽賓烏菟崑崙倭國及新羅百濟高
麗等諸蕃酋長各率其屬扈從穹廬氈帳及牛羊駝
馬填候道路是時頻歲豐稔斗米至五錢豆麥不列
于市議者以爲古來帝王封禪未有若斯之盛者也
十二月丙午至齊州停十日丙辰發靈巖頓至於太
嶽之下庚申帝御行宮牙帳以朝羣臣

乾封元年正月戊辰朔有事於泰山親祠昊天上帝

於封祀之壇已巳帝登於泰山封王牒於介丘庚午
降禪於社首山皇后爲亞獻越國太妃燕氏爲終獻
先是李勣許敬宗等議封禪儀注請以高祖太宗二
座俱配昊天上帝表曰臣聞殷薦上帝事有明文祖
宗並列抑惟通軌雖三五以降損益不同漢魏以還
沿革殊致至於帝郊嚴配之儀尊祖敬宗之典固以
因心弘範緣情作則孝思聖敬迴冠往初茂實宏規
逢高終古伏惟高祖太祖皇帝收物創業撥亂反正
受終明二統之曆執競隆七百之基御極垂衣稱物
平施隨山靜稽天之浸授首撲燎原之災玄功暢於

六虛聖績覃於四海巍巍蕩蕩無得而稱太宗文皇
帝鑿乾履度括地提衡翦脩蛇於洞庭戮蚩尤於中
冀戡召雨追風之孽執斷鰲練石之勤徵禹之功用
軫宣尼之歎曰文之德實符姬旦之時獻智神武含
弘光大深居高視懷日月以炤臨剛健柔明體乾坤
之博厚求賢勞於宵夢拜善急於朝飡摠宇宙以彌
綸運陰陽而陶鑄變澆偽於華胥之俗還淳朴於大
庭之辰九譯同文八荒順軌人神以合祥瑞畢臻巢
鳳下窺羗麟易擾山車澤馬遠服瑤池之駕醴泉甘
露近克上壽之尊優遊垂拱制禮作樂遠鏡百王獨

丹房元書封禪二
卷之三十六
為稱首再造區夏重安宸極昊天成命二帝受之升
降節文不宜差別而肅恭禋祀綴兆分位升中告禋
天地別饗乖嚴父配天之文失尊親加隆之數今歸
功中嶽請以二帝並配竊以太穆皇后造舟備禮爰
定厥禋處人倫之經居風化之始追蹤文母播美周
姬文德皇后倪天作合曾沙表慶功侔十亂化被二
南兩聖既已配封則二后應渾配禋申宸恩淳深之
極弘聖朝敬愛之旨自我作古聞之往策周制所定
夫何足云斯乃振揚休烈昭宣懿範請存乎不刊未
嘗來葉詔從之又皇后武氏上表曰伏以封禪舊儀

祭皇地祇以太后昭配皆以公卿行事以妾愚誠恐
未周備何則乾坤定位剛柔之義已殊經禮載陳中
外之儀斯別豈有推尊先后而以宰臣參祭詳求至
理有紊徽章妾望以展禮之日摠率六宮內外命婦
親臨奠獻以申如在之敬詔許之壬申御朝觀壇受
朝賀大赦癸酉帝謂群官曰升中大禮不行來數千
載近代帝王雖稱封禪其間事有不同或爲求仙克
禋或以巡遊望拜皆非尊崇祖業近在隋朝喪亂最
甚老小填溝壑少壯染兵鋒高祖發自晉陽撥亂反
正先朝躬擐甲冑贊成大業掃除氛祲廓清區宇遂

得四海宅心萬方仰德朕丕承寶曆十有七年終日孜孜夙夜無怠屬國家無事天下太平華夷乂安遠近輯睦所以躬親展禮褒贊先勲情在歸功固非爲已遂得上應天心下允人望今大禮旣畢深以爲慰公等休戚是同故應共有此慶欲與公等飲饌盡歡各宜在外更衣卽求相見仍勅所司撤幄帳施王床三品已上升壇四品已下縱列坐壇下從酒設樂羣臣及諸嶽牧競來上壽起舞日晏方止戊寅詔兗州置寺觀各三所觀以紫雲仙鶴萬歲爲稱寺以封巒非烟重輪爲名丙戌發自泰山改號封祀壇爲舞鶴臺介丘壇爲萬歲臺降禪壇爲景雲臺以祀日各有靈鶴及山呼萬歲之瑞故也

上元三年二月詔以今冬有事於嵩嶽令所司草儀注務從典故閏二月詔以吐蕃犯塞停封嶽

調露元年七月詔以今年冬至有事嵩嶽宜令禮官學士等詳定儀注

十月庚申詔以突厥背誕其冬至於嵩山封禪宜權停

永淳二年七月庚申詔以今年十月有事於嵩嶽宜令禮官學士等審定儀注務展誠敬仍令天下嶽牧

及京官五品以上各舉所知有孝行儒學文武之士於是詔禮官議射牛之事太嘗博士裴守真奏議曰據周禮及國語郊祀天地天子自射其牲漢武唯封泰山令侍中儒者射牛行事至於餘祀亦無射牲之文但親春射牲雖是古禮久從廢省不可復行據封禪祀禮日未明十五刻宰人以鑿刀割牲質明而行事比鑿駕至祠所牢牲總畢天皇唯奠玉酌獻而已若今祀剪一日射牲事即傷早祀日方始射牲事又傷晚若依漢武故事即非親射之儀事貴隨時不可行用神功破陣樂及功臣慶善樂二舞每奏上皆立

對守真又議曰竊惟二舞肇興謳吟攸屬贊九功之茂烈叶萬國之歡心義均韶夏用蕪賓祭皆祖宗聖德而子孫享之詳覽傳記未有皇王立觀之禮况升中大事華夷畢集九服仰垂拱之安百蠻懷率舞之慶陶甄化育莫匪神功豈於樂舞別申嚴禁臣等詳擬奏二舞時天皇不合起立詔並從之尋以帝不豫改用來年正月行封禪之禮十月癸亥車駕奉天宮十一月丙戌詔曰朕聞仁者德之本叶亭育之至途禮者道之末乃帝王之餘事歷選往初詳觀曩躅惻隱以孚其化變通以會其神朕以虛薄祇膺寶位肝

食宵衣懼忝於宗社如傷若厲佇濟於黎元每以皇
 基肇闢範圍覆載遺惠所覃昭格區宇虔荷靈命嘗
 慮下虧鴻業遍刊群嶽不足上報玄功已升聞於日
 觀思款謁於天臺志在告成諒非為已屬今茲豐稔
 方有事於嵩丘崇累聖之丕績祈兆人之嘉佑頃者
 分使出巡存問風俗河南河北尚有十餘州旱澇加
 以朔方寇盜時或侵邊關內流離未能復業一物失
 所獨甚納隍數郡不寧豈宜備禮前欲以來年正月
 封中嶽者宜停

高宗自東封之後天后盛勸行中嶽之禮頻下詔皆屬年飢又蕃夷寇邊而輟於嵩山之下營奉高宮以為有事之漸

玄宗開元十二年閏十二月辛酉文武百官吏部尚
 書裴漼等上請封東嶽曰臣聞道協乾坤聖人之玄
 德功存禮樂王者之能事故旁徵前載博考鴻名躬
 曆數之期遇天人之應莫不發號施令升中合符澤
 浸黎元以茂聲實者矣伏惟開元神武皇帝陛下握
 符提象出震乘圖英威邁於百王至德加於四海梯
 航接武畢盡戎夷之獻耕鑿終歡不知堯舜之力惡
 除氛沴增日月之光輝慶襲休榮雜烟雲之氣色靈
 物紹至休祥杳委江茅將鄙黍均芳雙貉與一莖齊
 烈固可以稽典訓設壇場悉符瑞之美答神祇之覲

大府元龜 封禪二 卷之三十六
謙而不發雖在於聖心理則難辭就違於天意臣幸
遭昌運謬齒周行咸申就日之誠願覩封禪之慶無
任勤懇之至謹於朝堂奉表陳情以聞帝手詔報曰
自中朝有故國步艱難天祚我唐大命集於聖真皇
帝朕承奉丕業十有餘年德未加於百姓化未覃於
四海將何以擬洪烈於先帝報成功於上玄至若堯
舜禹湯之茂躅軒后周文之懿範非朕之能逮也其
有日月之瑞風雲之祥則宗廟社稷之餘慶也天平
地成人和歲稔則羣公卿士之任職也撫躬內省朕
何有焉難違兆庶之情未議封崇之禮甲子侍中臣

乾曜中書令臣說等奏臣聞自古受天命居大寶者
必登崇高之丘行封禪之事所以展誠敬報神祇三
五迄今未之闕也是以高宗因武文之業盛岱亭之
禮方冊所記虞夏同風聖祚三朝年經五紀封崇之
典缺而未脩山川望幸屬在今日陛下靖多難尊先
朝天所啓也承大統臨萬邦天所命也焉可不陟東
岱禪云亭報上玄之靈恩紹高宗之洪烈則天地之
意宗廟之心將何以克厭哉且陛下即位以來十有
四載創九廟禮三郊大舜之孝敬也敦九族友弟兄
文王之慈惠也卑宮室非飲食夏禹之恭儉也道稽

古德日新帝堯之文思也憐黔首惠蒼生成湯之深仁也化玄漠風太和軒皇之至理也至如日月星辰山河草木羽毛鱗介窮祥極瑞蓋以薦至而爲嘗衆多而不錄正以天平地成人和歲稔可以報於神明矣鴻生碩儒上章奏而請封禪者前後千百聖情擢擗天鑒未回臣等仰考神心傍採衆望封巒展禮時不可抑陛下縱不欲以成功告天豈不可以天休報德臣等昧死上請以聞帝手詔報曰夫登封之禮告禪之儀蓋聖人之能事明王之盛業也朕以眇身託王公之上夙夜祇懼恐不克勝幸賴羣公以保宗社

至於休徵符瑞皆先帝遺慶朕何賴焉豈可以禮百神觀羣后備岱亭之禮展封祀之儀者哉雖誠請是違而宿心未服臣乾曜說等又上言曰臣等考天人之際稽億兆之情以爲治定功成登封告禪鴻名盛則屬在聖明陛下讓德冲深未允羣議神祇缺望臣等懼焉且今四海和平百蠻率職莫不合道德之甘實咀仁義之馨香是以上帝聿懷名山望幸珍符薦至年穀屢登開闢以來未之有也臣聞自古受命而封禪者七十二君安有殊風絕業足以方今也然猶躡梁父登泰山乘英聲騰茂實而陛下功德之美符

丹府天學 封禪二 卷之三十六
瑞之富固以孕虞夏含殷周矣有何退讓遂巡於大
禮哉夫昭報天地至敬也嚴配祖宗大孝也厚福蒼
生博惠也祭祭紀號丕業也陛下安可以闕哉况天
地之符彰矣祖考之靈著矣蒼生之望勤矣禮樂之
文備矣陛下安可以辭哉故臣等願因神祇之叶贊
順華夏之懇誠早稽舊章特垂新詔庶幾仲夏乘農
之隙以展巡狩肆覲之儀則天下幸甚臣等昧死重
請以聞帝又詔報曰夫治定然後制禮功成然後作
樂朕承奉宗廟恐不克勝未能使四海乂安此禮未
定也未能使百蠻效職此功未成也焉可以揚景化

告成功雖欲答於神祇終候安於兆庶再省誠懇惻
怛良深乾曜說等又再上言曰臣聞聖人者與天地
合德故珍符休命不可得而辭鴻名盛典不可得而
讓陛下功格上天澤流厚載三五之盛莫能比崇登
封告成理叶幽贊故符瑞異臻天意也書軌大同人
事也菽粟屢登和平也刑罰不用至理也今陛下稽
天意以固辭違人事以久讓是和平而不崇昭報至
理而闕薦祖宗億兆之情猶知不可况上帝臨炤神
宗顧謨其可止乎願納王公卿士列嶽縉紳之望廻
命有司速定大典臣等不勝懇切敢昧死再拜上請

以闡時儒生墨客獻賦頌者數百計帝不得已而從之丁卯下詔曰自古受命而王者曷嘗不封泰山禪梁父答厚德告成功三代之前率繇斯義自魏晉已降迄至周隋帝典闕而大道隱王綱弛而舊章缺千載寂寥封崇莫嗣物極而復天祚我唐武文二后應圖受錄泊于高宗重光累盛承至理登介丘懷百神震六合紹殷周之統接虞夏之風中宗弘懿鏠之休睿宗穆粹清之道巍巍蕩蕩無得而稱者也朕昔哉多難稟畧先朝虔奉慈旨嗣膺丕業是用創九廟以申孝敬禮二郊以展嚴禋寶菽粟於水火捐珠玉於

山谷兢兢業業非敢追美前王日慎一日實以奉遵遺訓至於巡狩大典封禪鴻名顧惟寡薄未遑時邁十四載於茲矣今百谷有年五材無青刑罰不用禮義興行和氣氤氳淳風淡泊蠻夷戎狄殊方異類重譯而至者日月於闕庭奇獸神禽甘露醴泉寤祥極瑞者朝夕於林籞王公卿士罄廼誠於中鴻生碩儒獻其書於外莫不以神祇合契億兆同心斯皆烈祖聖考垂裕餘慶故朕得荷皇天之景祐賴祖廟之介福敢以眇身而顯其讓是以敬承群議弘此大猷以光我高祖之不圖以紹我太宗之鴻業永言陟配祇

感載深可以開元十三年十一月十日式遵故實有事泰山所司與公卿諸儒詳擇典禮預爲備具勿廣勞人務存節約以稱朕意所緣封禪儀注兵馬陪集並皆條奏布告遐邇

十三年四月乙丑撫州三脊茅生有上封者言曰昔齊桓公九合諸侯一正天下將欲封禪問於夷吾夷吾對曰江淮間三脊茅生用以縮酒乃可封禪其時無茅桓公大慙而罷自歷千古今始一生昔宣王南征責楚包茅不入王祭不供則是其地其茅今高一尺至上八月長足方堪縮酒特望聖恩至時令采用

祭太山并掘根於苑內植之時宰臣已遣使於岳州探沅江茅乃奏曰管夷吾爲桓公是諸侯不合封禪故稱茅以拒之及伐楚之日尊周室行霸道及責楚云包茅不入王祭不供若以茅爲瑞是不知經義臣等歷任荆楚博訪貢茅沅江最勝臣已牒岳州取訖今稱撫州有茅請移根入苑且貉不踰汶橋不過江移根苑中信是虛語望勅撫州且進六束與沅江相比用之帝曰可癸酉詔朝集使各奉所部孝悌文武集於泰山之下

八月己未以封禪之故語中書令張說右散騎嘗侍

刑房元龜 封禪二 卷之三十六
徐堅太嘗卿韋紹秘書少監康子元國子博士侯行
果等與禮官於集賢書院刊撰儀注張說謂徐堅韋
紹等曰乾封舊儀禪社首享皇地祇以先後配饗王
者父天神而母地祇雖當今皇母位亦當往帝之母
也子配母饗亦有何嫌而以皇后配地祇非古之制
也天鑒孔明福善如響乾封之禮文德皇后配皇地
祇天后爲亞獻越國太妃爲終獻宮闈接神有乖舊
典上玄不祐遂有天授易姓之事宗社中圯公族誅
夷皆由此也景龍之季有事園丘韋氏爲亞獻皆有
婦人升壇執籩豆滌黷穹蒼享祀不潔未及踰年國

有內難亞獻皆受其咎平座齋郎及女人執祭者多
亦天卒今主上尊天敬神事須革正斯禮請以睿宗
大聖貞皇帝配皇地祇侑神作主及定儀奏聞帝從
之張說徐堅康子元等又建議曰臣等謹按明慶年
禮部尚書許敬宗因脩禮奏改燔柴在於祭前狀稱
祭祀之禮必先降神周人尚臭祭天則燔柴者臣等
按禮迎神之義樂六變而天神降八變而地祇出九
變則人鬼可得而禮矣則降神以樂周禮正文非謂
燔柴以降神也按尚臭之義不爲燔之先後假如周
人尚臭祭天則燔柴則殷人尚聲何聲可燔先迎神

冊府元龜 封禪二 卷之三十一
乎又按明慶中無忌等奏晉氏之前猶遵古禮周魏以降妄爲損益者今按郭璞晉南郊賦及注爾雅祭後方燔又按宋志所論亦祭後方燔又檢南齊比齊及梁郊祀亦飲福酒訖燔又檢後周及隋郊祀亦先祭後燔據此周遵後燔晉不先燔無忌之言事乃相乖又按周禮大宗伯職以玉作六器以禮天地四方注云禮謂始告神時薦於神座也又文云以蒼璧禮天以黃琮禮地皆有牲幣各於其器之色又禮器云有以少爲貴者祭天特牲是知蒼璧之與蒼牲俱合奠之神座理卽不惑又云四圭有或以祀天旅上帝

卽明祀昊天上帝之時以旅五方天地明矣其青圭赤璋白琥玄璜以立春立夏立秋立冬日各於其方迎氣所用自分別矣今按明慶所改新禮以蒼璧與蒼牲幣俱用先燔蒼璧旣已燔矣所以遂加四圭有卽奠之神座蒼牲旣燔矣所以更加騂牲克其實俎混昊天於五帝同用四圭失特牲之明文加爲二犢深乖禮意事乃無憑考功員外郎趙冬曦太學博士侯行果又曰先焚者本以降神行之已久中書令張說又執奏曰徐堅等所議燔柴前後議有不同據祭意及貞觀明慶已後卽先燔若欲正失禮求祭意請

從貞觀禮如且因循不改請從明慶禮凡祭者本以敬爲主心至則通於天地達於神祇既有先燔後燔自可斷於聖意聖意所至則同於神燔之後臣等不敢裁定帝令依後燔及先奠牲璧之議是後太嘗卿寧王憲奏請諸郊壇特祭並依此先奠璧而後燔柴瘞埋帝從之時又以四門助教施教本駁奏舊封禪禮八條其略曰舊禮侍中跪取匱沃盥非禮也夫盥手洗爵人君將致潔而尊神故小臣爲之今侍中大臣也而沃盥於人君太祝小臣也反詔祝於天神是接天神以小臣奉人君以大臣故非禮按周禮

太宗伯曰鬱人下士二人課事則沃盥此職也漢承秦制則無鬱人之職故使近臣爲之魏晉至今因而不改然則漢禮侍中之行則可矣今以侍中爲之則非也漢侍中其始也微高帝時籍儒爲之惠帝時闕儒爲之留侯子辟彊年十五爲之至後漢樓堅以議郎拜侍中邵闔自侍中遷步兵校尉其秩千石少府卿之官屬也少府卿秩中二千石丞秩千石侍中與少府丞班同魏代蘇則爲之舊侍中親省起居故謂之執獸子吉茂見則嘲之曰仕進不止執獸子是言其爲褻臣也今侍中名則古宦人非昔任掌同燮理

寄實鹽梅非復漢魏執獸子之班異乎周禮鬱人之職行舟不息墜劍方遙驗刻而求可謂謬矣夫祝以傳命通主人之意以薦於神明非賤職也故兩君相見則卿爲上饋况天人之際其肅恭之禮以兩君爲喻不亦大哉今太宰太祝下士也非所以重命而尊神之義也然則漢太祝是禮矣何者按周禮太宗伯曰太祝下大夫二人上士四人掌六祝之祠太宗伯爲上卿今禮部尚書太嘗卿比也小宗伯中大夫今侍郎少卿比也太祝下大夫今郎中太嘗丞比也上士四人今員外郎太嘗博士比也故可以處天人之

際致尊極之祠矣又漢太祝令秩六百石與太嘗博士同班梁太祝令與南臺御史同班今太祝下士之卑而居古下大夫之職斯又刻舟之論不殊於前矣又曰舊禮謁者引太尉升壇亞獻非禮也謁者已賤升壇已重是徵名用之欲合於古而不知矣於古而變於今也按漢官儀尚書御史臺官屬有謁者僕射一人秩六百石銅印青綬謁者三十五人以郎中滿歲稱給事未滿歲稱權謁者又按漢百官公卿表光祿勳官屬有郎中員秩比二千石有謁者掌兵贊受事員七十人秩比六百石則古之謁者秩異等今謁

冊府元龜 封禪二
者班微以之從事可謂踈矣又曰舊禮尚書令奉玉牒今無其官請以中書令從事又按漢武帝時張安世爲尚書令遊宴從官以宦者一人出入帝命改爲中書謁者令至成帝罷宦者用士人魏黃初改秘書署中書監令舊尚書拜掌制誥既置中書官而制誥樞密皆掌焉則自魏以來中書是漢朝尚書之職今尚書令奉玉牒是用漢禮其官旣闕故以中書令主之議奏玄宗令張說徐堅石敬本與之對議詳定說等奏曰敬本所議其中四條先已改定有不同者望臨時量事改攝制從之癸亥以東封鹵簿人少召外

州音聲人助之隨駕警衛十月己未勅曰自古明皇仁及萬物今助天寧育方欲告成其緣祭祀及在路供頓犧牲餼牢禮不可闕除此外天下諸州並令斷屠及漁獵採捕駕廻至京任依常式辛酉帝發東都巡狩庚午至濮州河南百五里內父老皆獻牛酒還其牛各賜帛一疋遣之丁丑白鵠見于行宮

十一月丙戌至泰山之下去山趾五里丁亥帝袞冕服於行宮致齋戊子敕曰封祀告成爲萬姓祈福必資清潔以副朕心其行事官及齋郎應致齋者宜令御史行齋切勿容踈怠有雄野鷄飛入齋宮馴而不

去久之飛入仗衛忽不見邠王守禮等賀曰臣謹按舊典雌來者伯雉來者王又聖誕酉年鷄主於酉斯蓋王道遐被天命休禎臣請宣付史官以彰靈貺從之已丑日南至帝備法駕登山旌旗天仗雲屯百餘里環衛於嶽之下列于廬於巖谷文武百僚二王後孔子後諸方朝集使及蕃夷君長咸從事日有詔應行從群臣並留於谷口帝獨於宰臣及升壇行事之官登于嶽上齋宮之所初帝以靈山清潔不欲誼繁將令初獻於山上壇行事亞獻於山下壇行事召禮官學士賀知章等人講儀注因問之知章等奏曰昊

天上帝君位五方精帝臣位帝號雖同而君臣異位陛下享君位於山上群臣禮臣位於山下誠足垂範來葉爲變禮之大者也然禮成於三初獻亞終合於一處帝曰朕正欲如是故問卿耳於是勅三獻於山上行事其五方帝及諸臣座於山下壇行事帝因問玉牒之文前代帝王何故秘之知章對曰玉牒本是通於明神之意前代帝王所求各異或禱年筭或思神仙其事微密是故外人莫知之帝曰朕今此行皆爲蒼生祈福更無私請宜將玉牒出示百僚使知朕意其詞曰有唐嗣天子臣某敢昭告于昊天上帝天

啓李氏運興土德高祖太宗受命立極高宗升中六合殷盛中宗紹復繼體不定上帝眷祐錫臣忠武底綏內難推戴聖父恭承大寶十有三年敬若天意四海晏然封祀岱宗謝成于天子孫百祿蒼生受福庚寅祀昊天上帝于山上高祖神堯皇帝配享帝冕裘升壇奉珪璧奠獻以邠王守禮亞獻寧王憲終獻命有司享五帝百神於山下壇禮畢帝乃飲福酒中書令張說進稱賜皇帝太一神策周而復始未綏兆人帝拜稽首山上作圓臺四階謂之封祀壇臺上有方石再累謂之石碓王牒王冊刻玉填金爲字各盛以

玉匱緘以金繩封以金泥皇帝以受命寶印之納玉匱二於碓中金泥碓際以天下同文之印封之然後焚柴燎祭群臣稱萬歲傳呼從山頂至於山下振動天地於是整鑾輅還山下之齋宮有慶雲隨馬祥風繞輅中書令張說等蹈舞拜賀帝曰朕以薄德恭膺太寶雲物休祐皆是卿等輔弼之力君臣相保勉副天心長如今日不敢怠矜說等又奏曰聖心誠懇昨夜致齋則息風收雨今朝封祀則天清日暖復有祥風助樂卿雲引燎靈迹盛事自古未聞陛下又思慎終如初長福萬姓天下幸甚辛卯祀皇地祇於社首

之泰圻壇睿宗大聖真皇帝配享藏玉策於石碣如
封祀壇之儀初帝登山至齋宮其夕陰雲慘冽勁風
四起裂幕折柱寒氣切骨帝露立祈請仰天自誓曰
某身有過請即降罰萬人無福亦請某爲當罪應時
風止天地清晏日氣和煦及升壇休氣四塞登歌奏
樂有祥風自南而至絲竹之聲飄若天外及禪社首
五色雲現見日重輪壬辰帝御朝覲壇之帳殿朝群
臣大赦天下詔曰朕躬陟天門宿齋日觀時屬嚴冬
雪後初夜風寒朕因露立祈恩誓欲代人當咎俯仰
之際頓息霜飈奠獻之晨變同韶景誠荷上天垂祐

亦賴靈山吐祥詩云無德不報宜封泰山神爲天齊
王禮秩加三公一等宜令所管崇飾祠廟去十里禁
其樵採給近山二十戶以奉祠神天下賜酺七月帝
製紀泰山銘親禮勒於山頂之右壁其詞曰朕宅位
十有四載顧惟不德愴于至道任夫難任安夫難安
茲朕未知獲戾于上下心之浩盪若涉于大川賴上
帝垂休先后儲慶宰衡庶尹交修皇極四海會同伍
典敷暢歲云嘉熟人用大和百辟僉謀唱余封禪謂
孝莫大於嚴父謂禮莫尊於告天天符既至人望既
積固請不已固辭不獲肆余與夫二三臣稽虞典繹

漢制張皇六師震疊九寓旌旗有列士馬無譁肅肅
邕邕翼翼溶溶以至於岱宗順也爾雅曰泰山爲東
嶽周官曰兗州之鎮山實惟天帝之孫群靈之府其
方處萬物之始故稱岱焉其位居五嶽之伯故稱宗
焉自昔王者受命易姓於是乎啓天地薦成功序圖
錄紀氏號朕統承先王茲率厥典實欲報玄天之眷
命爲蒼生之所福豈敢高視千古自比九皇哉故設
壇場答休命則亦與百執事尚綏兆人將多于前功
而愆彼後患一夫不獲萬方其罪余一心有終上天
其知我朕惟實行三德曰慈儉謙慈者覆無疆之言

險者崇將來之訓自蒲者人損自謙者天益如是則
軌迹易循基構易守磨石壁刻金字奠後之人聽詞
而見心觀末而知本銘曰維天生民立君以理維君
受命奉天爲子代去不留人來無已德涼者滅道高
斯起赫赫高祖明明太宗爰革隋政奄有萬邦罄天
張宇盡地開封武稱有截文表時邕高祖稽古德施
周溥茫茫九夷削平一鼓禮備封禪功齊舜禹巖巖
岱宗衍我神主中宗紹運舊邦惟新恭已南面氤氳
化淳告成之禮留諸後人緬餘小子重基五聖匪功
伐高匪德矜盛欽若祀典丕承永命至誠動天福我

萬姓古封泰山七十二君或禪亭亭或禪云云其迹不見其名可聞祇通文祖光昭舊勳方士虛誕儒書不足秩后求仙巫神檢玉秦災風雨漢污編錄德木合天或承之辱道在觀政名非從欲銘之絕巖播告群牧於是中書令張說撰封祀壇頌侍中源乾曜撰社首壇頌禮部尚書蘇頲撰觀朝壇頌以紀聖德是日以侍中源乾曜爲尚書左丞相兼侍中中書令張說爲尚書右丞相兼中書令蓋以宰相之任佐于王化勒成岱宗特有寵也

二十三年九月丁卯文武百官尚書左丞相蕭嵩等

累表請封嵩華二嶽表曰臣聞封巒之運王者告成當休明而闕典乃臣子之深過伏惟開元神武皇帝陛下受命繼天應期光宅垂慶雲而覆露暢和氣以生成物荷深仁時惟天道文明之化洽矣穆清之風被矣淳源旣泳福應咸臻盈於天壤昭於方策蓋非愚下所能頌美且天之在上日監在茲嘉大聖之神功降元符以表德恭伸昭報祇事升中古昔大猷孰先茲道臣等覩休徵以上請陛下崇謙讓以固辭事恐勞人抑其勤願德音所逮自古未聞昔虞巡四嶽周在一歲書稱其美不以爲煩寧彼華嵩皆列近甸

復茲豐稔又倍他年歲熟則餘糧地近則易給況費務蓋寡咸有司存儲峙無多豈煩黎庶吏當首路以望屬車陛下往封泰山不秘玉牒嚴禋上帝本爲蒼生今其如何而闕斯禮伏願發揮盛事差擇元辰先檢玉於嵩山次泥金於華嶽天休既答人望見從上下交歡生靈幸甚臣等昧死敢此竭誠理在至公祈於俯途無任惓欵之至謹詣朝堂陳請以聞帝固讓不從手詔報曰升中于天帝王盛禮蓋謂臻茲淳化告厥成功今兆庶雖安尚竭豐年之慶邊疆則靜猶有踐更之勞況自愧於隆周敢追跡於大舜頃年迫

於萬方之請難違多士之心東封泰山於今惕厲豈可更議嵩華自貽慙慙雖藉公卿共康庶政求惟菲薄何以克堪朕意必誠宜斷來表也

二十八年九月己丑邠王守禮率宗子左丞相裴耀卿率百官僧道父老皆於朝堂抗表以時和年豐請封嵩華二山帝抑而不許

天寶九載正月文武百寮禮部尚書崔翹等累上表請封西嶽刻石紀榮號帝固拒不許翹等又奉表懇請曰自今月辛亥至於癸丑累表誠祈請紀榮號聖心冀默冲讓再三臣等伏讀綸言退增祗慄敢重瀝

愚懇期諸必遂臣聞聖人之言與春秋而同信上天之宰將影響而合符昭報不可以久稽成命不可以固拒今靈山警蹕望王鑿之升中儒林展儀思金匱之盛禮發祥儲祉喻以封山人事天時不可失也伏惟開元天地大寶聖文神武應道皇帝陛下祖武宗文重熙累洽霑風化而祇礪在動植而昭蘇外戶不倚餘糧栖畝其神功至道廣瑞殊祥前表縷陳安敢浮說夫修德以俟命勸功以告成將欲竭款神祇雍熙帝載未爲過越也伏惟覽公卿之議考封禪之禮陟華蓋於翠微轉鈞陳於雲路泥金於菑萑之上刻

王於明星之前使三五六經復再闡於唐典七十二姓不獨紀於夷吾敷景福以浸黎元錫大慶而後天地蒼生之望也朝廷之幸也無任誠懇悃欵之至謹詣朝堂奉表陳請以聞帝手詔不許曰輕脩大典所不願爲時或傳中旨請紀榮號何如空云請封西嶽乙卯群臣又奉表請封西嶽曰臣翹等伏稽古訓上請增封再奉明旨未蒙允諾臣等承詔惶駭失圖臣聞省方展義君人之大典登封告成王者之丕業是以古先哲后道洽則封所以答神祇之功增兆庶之福無私於已故行之者不思必順於天故言之者難

奪敢昧萬責竭誠終請伏惟開元天地大寶聖文神武應道皇帝陛下紹文武之丕烈合君臣於昌運均雨露和陰陽西海無波而靜默群生自樂而仁壽繇是德懷蠻貊澤洎昆蟲宗廟祀典罔不祇肅要荒殊俗亦莫不庭白皇王已來載籍所記未有混區宇窮禎祥地平天成德茂道洽若今日之盛者與固可告太平之功展封崇之禮故臣與王公侯伯黎老緇黃累陳白奏備竭丹懇豈謂聖恩猶阻皇鑒未廻伏奉癸丑詔書曰輕儉大典所不願爲臣等戰慄匪遑寧處實以陛下功成道洽理實升中且夫龜龍咸格天

意也夷夏大同人事也時和年豐太平也無爲清淨至理也允應大典豈謂輕修乎奉若靈命安可不爲乎臣等敢冒宸極重明其義竊以西嶽華山寶鎮京國皇虞之所循省靈仙之所依憑固可封也況金方正位合陛下本命之符白帝臨壇告陛下長生之錄發祥作聖抑有明徵又可封也昔周成王以翦桐爲戲唐叔因是而定封蓋人君之言動有成憲斯事至細猶不忽也況陛下眷言封祀宿著神明道已洽於升平事未符於琬琰豈可抑至公於私讓棄誠信於神明乎固不可得而辭也日者封章累奉嘉應必臻

一獻而葺雨流再陳而瑞雪降則知人天之意影響合符若然者陛下安得稽天命以固辭違人事以久讓太平不告其若休祥何至理不答其若神祇何伏願仰答天心允祇靈贖上以揚祖宗之盛烈下以副億兆之懇誠克崇上報永光大典臣等幸甚宗子又上表口臣徹等伏見禎祥委積河海澄清長瞻北極之尊屢獻西封之䟽誠懇不達天鑒未從徘徊闕庭隕越無地陛下再造區寓肇康生人與天合符與道合契故得靈芝表瑞玉板呈文九穀歲衍於京坻百蠻盡習其冠帶能事備於典策盛德光於祖宗升中

告成是屬今日惟夫太華高冠群山當其少陰鎮此西土自有虞巡狩歷祀三千夏殷以還罕能肆覲陛下雖加進寵號增崇廟宇而大禮未施精意空潔又陛下頃歲建碑曰嘗勤報德之願未暇封崇之禮萬姓瞻予言可復也臣以爲天地之主豈徒言哉神祇候望故已久矣伏願俯順百辟兆人之請明徵刻石銘山之記暫遷萬乘降被三峯奠珪璧於中壇奏笙鏞於上帝使普天蒙福重賜無疆頻冒宸嚴並期必遂無任懇切屏營之至謹詣朝堂奉表陳請以聞凡三上表上乃許之丁巳詔曰以今載十一月有事華

山中書門下及禮官詳儀注奏聞務從省便是載三月西嶽祠廟災時關中久旱詔曰自春以來頗憊時雨登封告禪情所未遑所封西嶽宜停

冊府元龜

淮南李嗣京參閱

西極文翔鳳訂正

豫章黃國琦較釋

帝王部 三十七

頌德

詩有六義其一曰頌所以議盛德之形容以其成功告於神明者也若乃駿命允集聖政光被武功震耀遠夷率服孝德昭著風俗歸厚乃至典禮修舉珍符沓委王澤漸漬時文載郁繇是群臣歸美頌聲並作

或端委穆清壽觴斯薦或奏御公車英詞煥發擗華
奮藻引商流羽是光帝德以播國風粲然可觀於斯
為盛至有述上世之懿烈揚無窮之休問固足以播
之筦籥昭示來裔皆所以揄揚褒贊極臣子竭忠稱
君之分也

舜作歌曰勅天之命惟時惟幾

因庶士允諧之政故作歌以戒安不忘危

救政也奉正天命以臨民惟在順時惟在慎微

乃歌曰股肱喜哉元首起哉

百工熙哉

元首君也股肱之臣嘉樂盡忠君之治功乃起百官之事業乃廣

臯陶拜

手稽首颺言曰念哉

大言曰颺咏歌以戒帝

率作興事慎乃憲

欽哉

憲法也天子率臣下為起治之事當慎汝法度敬其職

屢省乃成欽哉

屢數

也當數顧省汝成功敬忠以善無懈怠

乃賡載歌曰元首明哉股肱良

哉庶事康哉

賡續載成也帝歌歸美股肱義足故續歌先君後臣眾力乃安以成其義

成湯放桀于南巢惟有慙德

湯放桀武功成故以為號南巢地名有慙德慙

德不曰予恐來世以台為口實

恐來世論道我放及古天子嘗不去口仲

虺曰惟王不邇聲色不殖貨利

邇近也不近聲樂言清簡不近女色言貞

因殖生也不生資貨財利言不貪也既有聖德兼有此行

德懋懋官功懋懋賞用

人惟已改過不吝

勉於德者則勉之以官勉於功者則勉之以賞用人之言若自己出

有過即改無所吝所以能成王業

克寬克仁彰信兆民

言湯寬仁之德明信于天

下乃葛伯仇餉初征自葛東征西夷怨南征北狄怨

葛伯遊行見農民之餉于田者殺其人奪其餉故謂之仇餉仇怨也湯為是以不祀之罪伐之從此遂征

以言則近者著矣 曰奚獨後予怨者辭也攸徂之民室

家相慶曰猷予后后來其蘇湯所往之民皆喜曰待我君來其可蘇息民

之戴商厥惟舊哉史謂初征自葛始佑賢輔德顯忠遂良賢則

輔之德則助之忠則顯兼弱攻昧取亂侮亡弱則兼

攻之亂則取之有亡推亡固存邦乃其昌有亡道則

形則侮之言正義王者如此國乃昌盛德日新萬邦惟懷志自滿允族

乃離日新不怠自滿志盈溢王懋昭大德建中于民以義制事

以禮制心垂裕後昆欲王自勉明大德建大中之道于民率義奉禮垂優足之道于

後予聞曰能自得師者王求賢聖而事之謂人莫已若者亡

自多足人莫好問則裕自用則小謂則有得所以足

之益亡之道不問專固所以小

嗚呼慎厥終惟其始靡不有初鮮克有終殖有禮覆

昏暴有禮者封殖之欽崇大道永保天命王者如此王事則敬

天安命昏暴者復亡之道

周公居攝五年之末以文王受命不卒而終時天下

太平故承其意而告之作惟天之命之詩成王時唐

叔得禾異畝同穎獻諸天子王命唐叔歸國公于東

作歸禾周公既得命禾旅天子之命已得唐叔之禾遂陳成王歸禾

之命而推美成作嘉禾天下和同政之善者故周公

王善則稱君作書以嘉禾名篇告天下

宣王時仍叔為大夫作雲漢之詩以美宣王宣王承

厲王之烈內有撥亂之志遇裁而懼側身脩行欲銷

去之天下喜於王化復行百姓見憂故作是詩

尹吉甫為王卿士作崧高美宣王也天下復平能建

國親諸侯褒賞申伯焉尹官氏申國申伯宣王之舅也以賢人為王之卿士佐王

有功王以正禮遣申伯之也又作蒸民美宣王任賢使

能周室中興焉賢能謂樊侯仲山甫也其詩曰王命仲山甫式是百辟纘戎祖考王躬是

保又作韓奕美宣王能錫命諸侯梁山于韓國之山最高大為國之鎮

所望祀焉故美大其貌奕然謂之韓奕也梁山今在

馮翊夏陽西北韓姬姓之國也後為晉所滅故大夫

韓氏以為邑名焉其詩曰王錫韓侯其追其貊奄受北國因為伯又作江漢美宣王

能興衰撥亂命召公平淮夷也召穆公虎也淮夷水國在淮浦而夷行召

公受命伐而服之

召穆公為王卿士作嘗武之詩美宣王有嘗德以習

武事因以為戒

漢武東封泰山還登明堂御史大夫倪寬上壽曰臣

聞三代改制屬象相因政教之法象相因屬屬連也聞者聖統廢

絕聖統聖人之道業謂禮文也陛下發憤合指天地祖立明堂辟

雍祖始也宗祀泰一宗尊也六律五聲六律謂黃鍾大簇姑洗蕤賓夷則無射也

射也五聲宮商角徵羽也幽贊聖意幽深也贊明也神樂四合各有方象

四方色及五神祭以承嘉祀為萬世則則法也天下幸

甚將建太元本瑞登告岱宗發祉闔門以候景至癸

亥宗祀日宣重光上元甲子肅邕永享太平之世日抱重光謂日

有重日也將甫始之辭辭也太元太初曆也本瑞謂
白麟王昴之屬也以候景冬至之景也上元甲子太
初元年甲子朔旦冬至也宗尊也肅敬
也雍和也既敬且和則長為天所享也
光輝允塞天

文粲然塞滿也燦然明貌見象曰昭報降符應言天顯示景象日月昭明

也降下符應以報德化臣寬奉觴再拜上千萬歲壽制曰敬舉

君之觴

終軍為給事中從武帝幸雍祠五時獲白麟一角而

五蹄時每一足有五蹄也又有奇木其枝傍出輒復合於木

上帝異此二物博謀群臣訪其微意也軍對曰臣聞詩頌

君德樂舞后功異經而同指明盛德之所隆也南越

窟屏葭葦與鳥魚群葭蘆也或長則曰葦正朔不及其俗有司

臨境而東甌內附閩王伏辜南越賴救北胡隨畜薦

居薦屢也隨畜牧屢易故居不安往也左傳戎狄薦禽獸行虎狼心上古未

能攝大將軍秉鉞單于犇幕驃騎抗旌見邪右在抗

也右在從中國化也是澤南洽而威北暢也治專也若罰不阿

近舉不遺遠設官俟賢縣賞待功能者進以保祿罷

者退而勞力謂不堪職任者也刑於宇內矣刑法也言威法

於宇內也一履衆美而不足懷聖明而不專言自建

三宮之文質章厥職之所宜三官明堂辟雍靈臺也言於三宮班政教有文

質封禪之君無聞焉前世封禪之君不聞若斯之美也夫天命初定

萬事草創謂創始受命之君也及臻六合同風九州共貫必待

明聖潤色祖業傳於無窮潤色謂光飾也故周至成王然後

制定休徵之應見休美也徵証也陛下盛日月之光垂聖思

於勒成專神明之敬奉燔瘞於郊宮燔祭天地瘞祭地也祭天則燒

之祭地則薶之郊居謂秦時及后土也獻享之精交神積和之氣塞明

塞台也明者明靈亦謂神也而異獸來獲宜矣昔武王中流未濟

白魚入舟俯取以燎群公咸曰休哉謂伐紂時今郊祀未

見於神祇而獲獸以饋以饋謂克祭俎也此天之所以示饗

而上通之符合也宜因昭時令日改定告元改元年以告神

祇也昭明也令善也苴白茅於江淮發嘉號於營丘以應緝熙

苴作席也江淮職貢三脊茅為藉也嘉號封禪也太山在齊分野故曰營丘也或曰營封太山以名姓號

非苞苴之苴也使著事者有紀焉謂史官紀記也蓋六鵝退飛逆也

六鵝退飛象諸畔逆宋襄公伯道退也白魚登舟順也謂武王伐紂而魚入王舟象征

而必獲故曰順也夫明闇之徵上亂飛鳥下動淵魚亂變各

以顛推今野獸并角明同本也并合也獸皆兩角今此獨一故云并也

衆棧內附示無外也若此之應殆將有解編髮削左

衽襲冠帶要衣裳而蒙化者焉要衣裳謂着中斯拱國之衣裳也

而埃之耳對奏上甚異之繇是改元為元狩後數月

越地及匈奴名王有率衆來降者時皆以軍言為中

吾丘壽王為光祿大夫汾陰得寶鼎武帝嘉之薦宗

廟藏於其泉官群臣皆上壽賀曰陛下得周鼎壽王

冊府元龜 帝王部 卷之三十七

獨曰非周鼎帝聞之召而問之曰今朕得周鼎群臣皆以為然壽王獨以為非何也有說則可無說則死壽王對曰臣安敢無說臣聞周德始乎后稷長於公劉大於太王公劉后稷曾孫也太王文王之祖則古公亶父也成於文武顯於周公德澤上昭天下漏泉昭明也漏言潤澤下沾如屋之漏無所不通上天報應鼎為周出故名曰周鼎今漢自高祖繼周亦昭德顯行施恩布惠六合和同至於陛下恢廓祖業功德愈盛天瑞並至禎祥畢見昔秦始皇親出鼎於彭城而不能得天祚有德而寶鼎自出此天之所以與漢迺漢寶非周寶也上曰善群臣皆稱萬

歲賜壽王金十斤

宣帝時天下和平四夷賓服神爵五鳳之間屢蒙瑞應而益州刺史王褒欲宣風化於衆庶聞王褒有俊才請與相見使褒作中和樂職宣布詩中和者言政治和平也樂

職者言百官各得其職也宣布者風化所洽無所不被選好事者令依鹿鳴之

聲習而歌之時況鄉侯何武為童子選在歌中久之武等學長安歌太學下轉而上聞宣帝召見武等觀之皆賜帛謂曰此盛德之事吾何足以當之褒既為

刺史作頌即上中和樂職宣而詩也又作其傳解釋頌之意益州刺史因奏褒有軼材迺徵褒既至召為

聖主得賢臣頌

後漢明帝永平十七年公卿百官以帝威德懷遠祥物顯應乃並集朝堂奉觴上壽制曰天生神物以應王者遠人慕化實繇有德朕以虛薄何以享斯唯高祖光武聖德所被不敢有辭其敬舉觴太嘗擇吉日策告宗廟

章帝建初三年正月己酉宗祀明堂時郎中傅毅追美孝明皇帝功德最盛而廟頌未立乃依清廟作顯宗頌十篇奏之元和中始脩古禮巡狩方岳崔駰上四巡頌以稱漢德辭甚典美時丁鴻以少府從上奏

曰臣聞古之帝王統治天下五載巡狩至于岱宗柴祭於天望秩山川協時月正日角斗斛權衡使人不爭陛下尊履蒸蒸奉承弘業祀五帝於明堂配以光武二祖四宗咸有告祀瞻望泰山嘉澤降澍柴祭之日白雲上升與燎煙合黃鵠群翔所謂神人以和答饗之休符也帝善焉

魏太祖以孫權稱臣遺詔大理王朗朗答曰孫權前牋自詭躬討虜以補前愆後疏稱臣以明無二牙獸屈膝言鳥告歡明珠南金遠珍必至情見乎辭効著乎功三江五湖爲沼于魏西吳東越化爲國民鄢郢

既拔荆門自開席卷巴蜀形勢已成重休累慶雜沓相隨承旨之日撫掌擊節情之畜者辭不能宣晉武帝時摯虞爲聞喜令時天子留心正道又吳寇新平天下又安虞上太康頌以美晉德潘岳辟太尉府舉文章秀才武帝躬耕籍田岳作賦以美其事

元帝初王廙爲琅琊王司馬王敦啓爲荊州刺史及帝卽位廙奏中興賦上疏曰臣託備肺腑幼蒙洪潤受自齧齒至於弱冠陛下之所撫育恩侔於兄弟義同於交友思欲攀龍鱗附鳳翼者有年矣是以昔忝濮陽棄官遠跡扶持老母携將細弱越長江歸陛下

若誠以道之所存願託餘蔭故也天誘其願遇陛下中興當大明之盛而守局遐外不得奉瞻大禮聞問之日悲喜交集昔司馬相如不得觀封禪之事慷慨發憤况臣情則骨肉服膺聖化哉又臣昔嘗侍坐於先后說陛下誕育之日光明映室白毫生於額之左相者謂王當有四海又臣以壬申歲見用爲鄱陽內史七月四星聚於牽牛又臣郡有枯樟更生及臣後還京都陛下見白兔命臣作賦時琅琊又獻甘露陛下命臣嘗之又驃騎將軍道向臣說晉陵有金鐸之瑞郭璞云必致中興璞之爻筮雖京房管輅不過也

明天之曆數在陛下矣臣少好文學志在史籍而飄放遐外嘗與桀寇為對臣犬馬之年四十三矣未能上報天地而誓負屢愆恐先朝露與溝壑令微情不得上達謹竭其頑獻中興賦一篇雖未足以宣揚盛美亦是詩人嗟歎詠歌之義也

成帝咸康八年九月廬江春穀縣留珪夜見門內有光取得玉鼎一枚圍四寸豫州刺史路永以縣著作郎曹毗上玉鼎頌

孝武帝時袁宏為東陽太守以漢時傅毅作顯宗頌辭甚典雅乃作頌九章下頌簡文之德上於帝

後魏道武既破賀納逐命群臣登勿居山遊宴終日從官及諸部大人請聚石為峯以紀功德命張襄為文

獻文時高允為中書令從帝北伐大捷而還至武川鎮上北伐頌帝覽而善之

高閭為昭武將軍時獻文傳位從御崇光宮閭上表頌孝文時閭為中書監太和三年冬至帝及文明太后大饗群官帝親舞於太后前群臣皆舞帝乃歌仍率群臣再拜上壽閭進曰臣聞大夫行孝義合一家諸侯行孝聲著一國天子行孝德被四海今陛下聖

性自天敦行孝道稱頌上壽靈應無差臣等不勝慶
踊謹上千萬歲壽帝大悅賜羣臣帛人三十疋

宣武永平中甄楷上孝文頌十三篇優詔報之

高聰為散騎常侍黃門侍郎宣武幸鄴還於河內懷
界帝親射矢一里五十餘步侍中高顯等奏伏見親
御弧矢臨高設弋鳴弦動羽馳鏃所逮三百五十餘
步臣等伏惟陛下聖武自天神藝夙茂巧會鳴虞之
節妙盡矍圃之義威稜攸疊彪光攝氣才猛所振勃
慙彌心足以肅截九區赫服八字矣盛事奇迹必宜
表述請勒銘射宮永彰聖意詔曰此乃弓弧小藝何

足以示後葉喉唇近侍苟以為然亦豈容有異便可
如請遂勒銘於射所聰為之詞

隋高祖時突厥葉護可汗以帝所賜旗鼓西征嬰婆
遂生擒嬰婆既而上書請嬰婆既生之命上下其議
左僕射高頴進曰骨肉相殘教之蠹也存養以示寬
大帝曰善頴因奉觴進曰自軒轅以來獯鬻多為邊
患今遠窮北海皆為臣妾此之盛事振古未聞臣敢
再拜上壽

唐高祖武德八年四月赤雀巢於殿門宴五品已上
上頌者十餘人極歡而罷

七月高祖從容謂侍中陳叔達曰自古帝王統一四海者凡有幾人對曰五帝三王已前年代浸遠近古已來有秦始皇之與兩漢下洎晉武耳高祖曰朕幸得繼前哲於朕良多叔達又對曰隋末亂離蒼生塗地若不逢陛下救其淪溺黎庶殆為魚矣此蓋天授非人力所致帝大悅

九年四月給事中歐陽詢奏上帝德論帝覽之稱善太宗貞觀三年正月親祭先農躬御耒耜籍于千畝之甸初晉氏南遷後魏來自雲朔中原分裂又雜以獯戎代歷周隋此禮久廢而今始行之觀者莫不躍

駭於是秘書郎岑文本獻籍田頌以美之臣欽若等曰按後魏

後周並耕藉田與此所載有異

六年閏八月秘書少監虞世南上聖德論帝手詔答曰卿所論太美但朕德甚寡恐有識者窺卿為後人所笑卿引古昔無為而治朕未敢擬倫比之近代乍踰之耳卿覩朕之始未見朕之終宜付秘書若朕能慎終如初則可為也如違此道不用後代笑卿焉十四年二月陝州言河水變清司空長孫無忌等詣闕上表曰臣聞崑崙戴極道玄液以周天積石疏源委滄波而括地俯作神州之紀仰膺上帝之宮水德

靈長斯其謂矣故能道符千載位長百川瑞馬開圖
發榮光於遠代應龍闢壤致宅上於遐年自此不追
寂寥難俟天之祚聖復在於茲伏惟皇帝陛下則哲
承基窮神闡化功緜寓外德耀瀛表文教蔚乎三五
至道格乎天地是以禎凝藪澤慶溢風煙丹井輝奇
青丘表異嘉苗合穎入豐膳以鳴鍾天駟灑雲播頌
聲於綴兆西鸛南雉之賚日至月書連珠湧醴之徵
雲霏霧集宜其展事羸里仰告成功出豫介丘方騰
茂實猶且宵衣旰食若有追而不逮對越嘉祉乃固
辭而弗居遂使萬玉韜華三神缺望西星佇昭申以

德水之祥東岳希封最以清河之貺陝州刺史房仁
裕狀稱所界內二百餘里正月元日黃河載清謹按
易乾鑿度曰聖人受命河水清京房飛候曰河水清
天下太平繇是納涓合涇混流同潔凌門幼澤別派
俱清馬頰馳波詳觀若鏡龍門激箭廻眺飛空滔天
之曲煥然冰夷之都可見千尋朗澈俯映玄珠一曲
澄鮮遙觀紫貝盡河宗之奧秘洞水府之仙靈豈非
天鑒詳明不愛其道神心昭著在感斯通何幽顯合
符人祇交際理均形契若斯之効歟臣等沐道醉心
觀祥駭目按圖逃聽曠古無聞實慶生涯親承旦暮

詔答曰嘉瑞爰降必資至德大河効祉是為希世顧
 惟寡昧但增慙惕乃天地表祥宗社垂祐欲使四海
 隆平八荒禔福王公卿士內外庶僚宜勉脩正道以
 副靈貺焉是月帝幸國學觀釋奠命祭酒孔穎達講
 孝經既畢穎達上釋奠頌帝手詔褒美
 十五年十月太宗問特進魏徵曰朕為人主仰止前
 烈至于積德累仁豐功厚利此四者帝王以為稱首
 朕皆庶幾自勉人苦不能自見不知於朕之身何等
 為優徵曰德仁功利陛下兼而有之然則內平禍亂
 外除戎狄是陛下之功安堵黎元各有生業是陛下
 之利繇此言之功利居多

十六年七月太宗謂侍臣曰朕數召公等欲問愆闕
 庶幾善道以救不逮耳今嘗達夜不寢思為政術非
 惟憂勤萬姓亦欲貽法後昆司空長孫無忌奏稱古
 來撥亂人主載籍斯存天造草昧之辰爰始經綸之
 日何嘗不思聞帝道祇奉王度及即位之後漸染驕
 盈詩云鮮克有終此非空說陛下君臨四海將二十
 載視事之後每留群臣陛下為解威嚴貸以顏色唯
 欲其論國家善惡用康政化哀愍黎元聖情專切豈
 臣等獨蒙恩澤四海蒼生誰不幸甚

二十一年二月詔皇太子之國學釋奠賜學官胄子帛各有差仍擢其高業右庶子許敬宗上四言詩以美其事

二十二年四月磧外蕃人爭牧馬土界帝親臨斷決然後咸服黃門侍郎褚遂良進曰昔虞芮爭田去此二百里陛下聖德廣運無遠不臻磧外諸夷來斷境域振古以來所未聞也

玄宗開元二年六月左拾遺蔡孚獻龍池集王公卿士以上凡百三十篇請付太常寺其詞合音律者爲龍池樂章以歌聖德從之初帝在藩與宋王等居于

興慶里時人謂爲五王子宅及景龍末宅內神池涌出汎灑清瑩流之不竭中有龜龍遊焉故群臣歌之八年城門郎獨孤晏奏曰伏見聖上於別殿安置太宗高宗睿宗聖容每日侵早具服朝謁昔者周公宗祀文王於明堂以配上帝蓋有國之嘗祀聖上朝夕蕭恭是過周公遠矣又聞禁中寧王憲申王攜內朝宴會聖上宮中自拜跪如家人之禮岐王範薛王業恩錫特殊友愛邕睦海內稱之昔堯九族既睦平章百姓是過帝堯遠矣聖上近造一小院東西南北各三十餘步寢殿卑狹階高尺三寸房廊階不過四五

寸無青墀所坐氈褥非破不易是過於夏禹遠矣聖上嘗得絹四十餘萬疋謂侍臣等曰此物擬充男女嫁娶左藏庫物是百官諸邊將士物豈得漫用節約且過漢文遠矣聖上至德光厚躬勞庶政憂人飢寒昔齊若雨雪御裘憂勞凍餒但恤寒耳今聖上憂冬寒夏熱是過之遠矣請宣付史官從之

十三年十一月封東嶽禮畢於是中書令張說撰封祝壇頌侍中源乾曜撰社首壇頌禮部尚書蘇頌撰朝覲壇頌以紀聖德

十九年八月幽州執叛奚壽斤來獻宰臣裴光庭等

奏曰伏以深仁燭幽遠被無外至德感物矧茲有苗頃者奚壽斤放命不恭執訊來獻而陛下設誠不疑推致赤心歸于取洛襁負而至置之左右射御不違自非睿宗至誠被物何以驟改驕節卒爲忠臣變鴟梟於鸞鳳登反側於仁壽求諸前古竹帛所不載稽諸近事耳目所未聞臣等豫覩休異輒敢書于史冊帝曰奚壽斤往因脅從遂同逆命俘虜而至罪則難容救其悔過之心免其殊死之責推誠待物果獲忠臣此皆卿等輔弼之所致豈朕薄德之能感書之簡冊以示將來當斯美名良用慙惕

二十三年二月己亥以奚契丹既平宰臣裴耀卿張九齡李林甫等奏賀曰奚及契丹尤近邊鄙侵軼是慮式過成勞臣庶嘗惜欲其防禦所謂長策無出此者陛下獨斷宸襟高奪群議以爲頓兵塞下轉粟邊軍曠日持久役無寧歲若不因利乘便一舉遂平使遷善者自新爲惡者就戮其勞不久永息我人且命大兵臨之凶徒必潰不出此歲當並成擒臣等初奉聖謀高深未測及聞凱捷晷候不差遠蕃遺顛莫不稽顙緣邊戍卒咸返耕稼卧鼓熄烽誠自此始斯皆陛下睿謀先定禱筭非嘗觀變早於未萌必取豫於

無象臣伏以成功不宰君人所以爲重有美不宣臣子所以成罪臣雖蒙瞽安敢無言既豫開始謀又幸見成事豈可使天功虛往日用不知竹帛相傳復紀何事請宣付史館垂示將來仍許將吏等刊石立頌以紀功德帝手詔報曰事有難易因圖可卜小蕃背誕惡貫已盈人神棄之指期可滅今之尅定偶會夙心記以史官銘之樂石頗矜功伐不願爲之卿等苦論載用多愧使桓山之頌復在茲乎

八月癸巳千秋節命諸學士及僧道講論三教同異中書令張九齡上言曰臣聞好尚之論事蹟於偏方

至極之宗理歸於一貫非夫上聖孰採要旨伏惟陛下道契無爲思談玄妙考六經之同異筌二教之幽曠將以降炤群疑敷化率土屏浮詞於玉殿緝精義於金門一變儒風再揚道要凡百士庶罔不知歸臣等幸侍軒墀親承至訓抃躍之極實倍嘗情望宜付史館帝手詔報曰畧舉三教求之精義會三歸一初分漸頓理皆其貫使自求之卿等論議廟堂化源何遠事關風教任付史官

天寶元年五月濮陽郡王瓌及嗣王宗子等奏曰臣等伏以龍池肇慶寶祚攸章聖德動天禎符薦至臣等憤深家國志願光揚去開元二十二年於東京朝堂上表請建龍池聖德頌曲蒙天睠俯遂微誠其時脩營已就刻勒所爲頌文未備叙事多遺述聖談天萬不舉一既乖士庶之望莫展宗臣之心尋請改脩冀昭聖德斐然雖竭於愚思翰墨未絕於琬琰今屬靈符降祉景命維新天寶之號再加郊廟之儀式展誠合書其寶錄光闡徽猷綴集前文以存不朽特望天恩更許編錄則聖德鴻業紀而無遺聖美形容於茲允備無任勤懇之至謹奉表陳請以聞帝手詔報曰夫頌者美盛德之形容每省朕躬曷稱奇紀歲月

斯積符瑞屢臻欲備叙之復茲誠請實賴人事不遺
神明允來意也

八月突厥阿布惠與其黨屬來降中書門下奏曰臣
等伏以匈奴患邊其來日久頃雖朝廷示信約爲父
子之國然而戎狄無親嘗蓄豺狼之志陛下聖謀廣
運睿畧玄通至道昭感神明叶贊不勞一卒不煩一
兵使其種落自相携貳今葉護敗亡殞身漢北妻子
繯繫爲俘闕下巢傾席卷瓦解雲散萬里無事三邊
遂空曠古不賓盡爲臣僕普天所履皆人封疆諒蹂
負德背恩自速天亡之禍固亦休兵偃革用彰海晏

之期實有無方之神寧惟不戰之勝求諸載籍所未
嘗聞臣等幸遇昌期欣逢大慶望宣付史官從之
十二月西河大破吐蕃中書門下表賀曰臣等自今
月以來累見隴右奏大破吐蕃大嶺青海等軍捷書
前至日因奏事陛下謂臣等曰吐蕃背恩神人共棄
豈惟隴右頻勝三數日間河西當有大捷今日王倕
累奏大破吐蕃魚海及遊奕等軍擒生斬級并虜獲
羊馬不可勝計竊觀前後克捷皆是特稟聖謀密練
驍雄深討兇寇以寡擊衆所向無前天心與睿德合
符士卒與神兵叶契九重制勝動必有成萬里知來

見於未兆一月三捷千古未聞品物同歡何況臣等
伏望宣示朝野編于史冊詔曰坐運奇謀誠難與戰
河西捷書相繼謂之伐叛可豫圖之所請者依
九載靈州都督兼御史中丞張齊丘上言請於新築
北大都護府建聖德碑頌許之

十載九月中書門下奏曰臣等今日因奏事承德音
聞江南爲橘江北爲枳蓋以地氣有殊物性因變朕
近宮內種柑子樹數株今秋以來結實一百五顆乃
與江南及蜀道所進無別亦可謂稍異者伏以自天
所育者不能改有嘗之性曠古所無者乃可爲非常

之感是知聖人御物以元氣布和大道乘時則殊方
叶致且橘柚所植南北異名實造化之有功匪陰陽
之所革陛下玄風真紀六合一家雨露所均混天區
而齊被草木有性憑地氣而潛通故茲江外之珍果
爲禁中之花實綠蒂含霜芳流綺殿金衣爛日色麗
彤庭豈比夫搖木移根俟風而實若榴傳種因石爲
名理匪自於人謀事寔關於神化圖牒未有耳目攸
新臣等忝侍軒墀恭聞殊應喜慶交集倍萬嘗情仍
望宣示朝廷光諸史冊帝手詔報曰枳橘之性惟任
土不遷陰陽之和實在能感致且寒谷吹律猶氣變

燕郊則中樞化源故物備京邑今黃柑數株丹實盈
條衰露迎風香逾江劍金光珠澤秀溢林庭豈斯果
之足珍喜元和之必應故合天道信何遠焉所賀已
知仍依來請

十二月庚申勅安國寺以所撰先皇聖德頌刻石

其石皆上宜題親王嗣郡王及中書門下兩品五品以上
供奉官御史中丞左右丞侍郎諸司文武官員三品
以上兼節度使及蕃酋大首
領等各品准諸頌碑制名記

肅宗至正二年十二月玄宗自蜀至帝奉迎於望賢
宮左相苗晉卿中書侍郎同平章事崔圓表言伏見
工部侍郎李遵及殿中監李輔國言皇帝於望賢宮

奉迎上皇望樓趨馳捧足嗚咽問安既退侍膳皆親
及出宮之時親選龍媒侍從歸闕孝敬之至傍感人
神四海歸心恩深錫類群臣何幸得覩盛美陛下武
功冠於千古孝德踰於百王昔夏之有窮少康復其
業漢之新莽光武續其緒雖復崇名茂績輝映當時
而皆曠日持久動十數載致使宗社郡邑盪復無遺
未有如陛下神武奮發睿謀獨斷曾不再稔掃清群
兇奉迎聖皇不失舊物蒸蒸翼翼榮輝區宇考之傳
記振古未聞天地人神孰不慶幸臣請編諸史册傳
之不朽詔曰荷社稷之靈賴上皇之感翦除寇盜克

復京都浹辰之間大勲允集掃清宮闕奉迎鑾輿昨
自望賢宮得申拜慶重歡侍省深戴君父之恩承順
尊嚴固宜臣子之禮卿等許謨致理翼贊成功方告
史臣者懃薄德乙卯殿中監李輔國奉表上曰臣聞
古今大寶皇王受命成功創業皆始艱難繇是足高
光武之功漢圖斯未滅澆犍之患夏嗣以興豈比孝
以感通德以成化光膺聖曆協契天時開闢已來未
有如陛下者也頃巨猾開釁中夏不康陛下赫然發
憤奉命專征曾不踰旬兩京尅復掃清宮闕奉迎鸞
輿警蹕鳴笳舊儀逾盛行軍便幕故事無闕陛下整

法駕擁群臣遠自望賢拜迎路次引旌旂而祥風不
散拂鸞輿而瑞雪時飄承順天顏無違就養君父之
禮億兆同歡猶乃不自爲功至崇謙德週周文侍膳
之典邁漢高獻壽之儀虔奉至尊敬恭受命伏惟陛
下以孝理天下也如彼以德化天下也又如此盛德
大業其至矣哉臣幸忝締構職在禁戎得親盛明無
任抃躍伏請編諸史冊以示將來詔曰朕恭承明命
親總兵戎掃撥搶之妖拯生靈之患宗社所祐何往
不尅雖兆自於艱難而終盛於丕業昨日星順動鸞
輿迴京仰戴君父之恩重歡侍省之慶拜迎之目得

展孝誠特荷恩慈多慙薄德遂得祥風引旆瑞雪灑
途宮闕生光感應昭著卿爲朕心奮夙夜忠勤所請
宣付史館宜依

代宗大曆三年夏四月戊申乾陵上仙觀天尊殿有
雙鵠啣柴及泥補葺殿之隙壞凡一十五處宰臣等
上表賀曰臣聞孝至於天則祥發陵邑德被於物則
化及鳥獸伏惟陛下因心廣教弘道極和時因霜露
之恩流行雲雨之澤故前聖垂裕歆於明誠皇天報
貺賜以嘉應異鵠來感翔集可窺跡比人謀事歸神
化伏望宣示中外編諸史冊帝手詔答曰聖祖仙都

高宗園寢希夷清淨之所肅穆哀敬之地二鵠翔集
以月繫時常啣墜茨用補缺壞顧政禮之多闕而先
靈之幽助祇奉貺祐感切良深卿等道備梓材任當
構廈覩茲符應庶洽康寧寔賴嘉謨弼予不逮所請
編諸史冊者依

七年十月帝畋于禁苑一發連二兔遣使出示宰臣
仍賜之宰臣等拜舞稱慶抗表請付史官以紀鴻猷
手詔不許癸丑宰臣等又上言曰聞王者有日官動
而必書事無虛美用咸善終之義觀乎召舉之明體
合忠直輔宣法教斯良史之任也帝者盛美紀于一

時闕登雅頌彰示家國斯君子之罪也昔漢武有獲蛟之歌魏祖有南皮之事皆盛其殊能叙列前載玄宗開元中蒐於岐陽親御弧矢陳九軍之禮有百中之捷煥耀圖史布昭詠歌今陛下以豐歲皆秋農郊始隙因依時令習用戎事遊涉靈囿經于上蘭以一發之神連三窟之狡弦匪再控騎無角逐進異前禽之失舉明不合之圍事過舊聞妙歸天縱足以重威四夷高視千古恩賜之後榮慶中朝公卿庶尹動色相賀垂於簡牘允叶禮經若聖情冲深過於謙讓則史臣曠職後代無稱凡在庶位罔知所出伏愿特廻

聖慈俯遂誠情手詔答曰帝王之制禮有三驅弧矢之威財成理道朕方欲清靜流化無爲軌俗射御之藝闕而不書卿等爰據禮經博求良典舉聖祖岐陽之狩徵漢皇郊廟之歌再陳表章頌志簡冊式遵彝訓宜依所請

敬宗寶曆元年九月成德軍節度使王廷奏上言請於管内立皇帝聖德碑二年四月丙寅内出皇帝聖德碑本以賜廷奏

武宗會昌中幽州節度使張仲武討殺迴鶻烏介可汗至會昌末表請薊北立紀聖功銘帝詔遣宰臣李

德裕爲之

後唐明宗天成二年十二月延宰臣於玄德殿馮道奏曰先皇帝末年不撫軍民惑於聲樂遂致人怨幾墜不構陛下自膺人望軍民惠愛藩后入覲情同魚水時歲頗稔亦淳化所致也更愿居安思危保守今日帝然之

四年九月戊寅上御中興殿顧謂宰臣曰時事近日如何馮道奏曰臣省事以來無歲不聞戰伐蓋政令不一王綱弛紊伏自陛下纂隆五載服之以武威懷之以文德任賢不二去邪不疑天下歸心人知恥格近歲以來可謂無事

長興元年正月癸未上御中興殿謂宰臣曰近雖降春澤如何馮道奏曰今歲春初已見三白相次又降雨澤人情大洽蓋陛下聖德感通之應也臣聞天子事天臣下事君臣下若不供其職則刑法及之天子不守其道則災沴降之今陛下敬天事地憂勞百姓則歲有豐登

二年十二月己卯帝御中興殿宰臣馮道奏曰臘日陛下方憂雪是夜便降立春日又降雨澤皆得其節也自陛下臨御于今六載家給人足而又放鷹鷄之

類咸令遂性所謂仁及鳥獸也苟非聖德其孰能臻此

三年三月癸巳帝御中興殿顧謂馮道曰春雨太多乎道對曰春澤稍多是豐年之兆契丹孔熾自近朝以來中國多事未暇制服向者王都背叛連結邊戎陛下命將得人俾匹馬不回使其畏懼而修朝貢則知皇威所振邁于前古也

周世宗顯德四年五月癸卯翰林學士兵部侍郎知詔誥陶穀進紫芝白兔頌曰陛下嗣位之元年歲次甲寅薄伐太原興六月之師定王業也虎賁振旅兵

度孟津汜水獻紫芝三莖曄曄分化惹度關之氣越三載歲在丙辰親征淮夷破十萬之衆宣武功也戎輅旋軫途次商唐潁州獻白兔一頭皎皎効質凝炤社之光謹案瑞應圖曰王者恩霑行葦則紫芝秀五行傳曰國君德及昆蟲則白兔馴上宴息之暇有時臨翫觀禎祥而修德善馴擾之遂性三者昭萬物肇生之數白者叶太素返朴之義芝爲瑞也左盤右屈而自然成形兔之異也或白或蒼亦不嘗其色豈可使曠代嘉瑞來者無聞今聖君儉德罷露臺至仁祝踈羅重林衡不時之禁則草木茂矣崇宗廟初祭之

禮則禽魚樂矣若然則朱草萇莢將擢秀於庭際丹鳳麒麟豈空遊於郊藪下臣不佞再拜作頌頌曰美哉靈草邈矣明視慶上帝之所臨昭王者之嘉瑞考其祥稽其事芝為草也豈奪朱而効靈兔乃獸焉取字黑而為異徵其薦瑞之日俱在廻鸞之次酌物情順天意吾君當垂衣而治

冊府元龜

冊府元龜

淮南李嗣京參閱

西極文翔鳳訂正

豫章黃國琦較釋

帝王部 三十八

尊親 尊師 尊乳保

尊親

仲尼曰故雖天子必有尊也孟軻亦曰孝子之至莫大乎尊親夫自家刑國父天母地正位凝命總治綱紀巍乎在上風以化下鞠育之重經義攸著于以樹

崇名殊徽號異宮室之制申朝覲之禮增飾服用嚴備官屬晨夕奉養罄竭恭愛德教彌遠兆庶是賴書稱一人有慶者無善於此矣

虞舜踐帝位載天子旗往朝父瞽瞍

漢高帝六年三月帝歸櫟陽五日一朝太公太公家

令說太公曰天無二日土無二王皇帝雖子人主也

太公雖父人臣也奈何令人主拜人臣如此則威重

不行後帝朝太公擁篲為恭也如公迎門卻行卻退而行

也帝大驚下扶太公太公曰帝人主奈何以我亂天

下法於是帝心善家令言已心因得尊崇父號賜黃

金五百斤五月丙午詔曰人之至親莫親於父子故

父有天下傳國於子子有天下尊歸於父此人道之

極也前日天下大亂兵革並起萬民苦殃朕親披堅

執銳被堅謂甲冑也自帥士卒犯危難平暴亂立諸

侯優兵息民天下大安此皆太公之教訓也諸王通

侯將軍群卿大夫已尊朕為皇帝而太公未有號今

上尊太公曰太上皇太上極尊之稱也皇君也天子之父故號曰皇不預治國故不

言帝臣欽若等曰太上皇號始於此

惠帝高祖十二年五月丙寅即位尊母呂皇后曰皇

太后

文帝初封代王十七年高后喪大臣議立後疾外家
呂氏彊暴皆稱薄氏仁善故迎立代王為皇帝尊母
薄太后為皇太后

景帝即位尊母竇太后為皇太后

武帝即位尊竇太后曰太皇太后母王皇后為皇太

后臣欽若等曰漢因秦之稱號帝
母稱皇太后祖母稱太皇太后

昌邑王即位尊昭帝皇后上官氏為皇太后

宣帝即位尊皇太后曰太皇太后上官
后也皇母曰皇太

后即成王皇后母
養元帝者也

成帝即位尊皇太后曰太皇太后母王皇后曰皇太

后

哀帝即位尊皇太后曰太皇太后成帝趙后曰皇太

后又皇太后下詔尊定陶恭王為恭皇哀帝因是日

春秋母以子貴尊傳太后為恭皇太后丁姬為恭皇

后各置左右詹事食邑如長信宮

建平二年夏四月詔曰漢家之制推親親以顯尊尊

天子之至親
當極尊號定陶恭皇之號不宜復稱定陶尊恭皇

太后曰帝太太后稱永信宮恭皇后曰帝太后稱中

安宮成帝母太皇太后本稱長信宮成帝趙后為皇

太后並四太后各置少太僕秩皆中二千石

平帝中山孝王子也元壽二年即位元始元年六月

使少府左將軍豐豐甄豐也賜帝母中山孝王姬衛氏璽

書拜為中山孝王后孺子嬰立尊平帝王皇后為皇

太后

後漢明帝即位尊母陰皇后為太后

章帝即位尊明帝馬皇后為皇太后及太后喪乃策

書加所生母賈貴人王赤綬諸侯王赤綬也安車一駟永巷

宮人二百永巷宮中署名也後改為掖庭永巷宮人即宮婢也御府雜帛二萬

疋大司農黃金千斤錢二十萬

和帝即位尊章帝竇皇后為皇太后

殤帝即位尊和帝鄧皇后為皇太后

安帝清河王慶子也母曰左姬建元元年追尊父慶

為孝德皇尊孝德皇元妃耿氏為其陵大貴人比陵

皇之陵也

桓帝即位尊母閔氏為孝崇博園貴人帝追尊父蠡吾侯翼曰孝

崇皇置園廟曰博園

和平元年梁太后葬就博陵尊貴人為孝崇皇后遣

司徒持節奉策授璽綬齋乘輿器服物備法物宮曰

永樂置太僕少府已下皆如長樂宮故事漢官儀帝祖母稱長

信宮帝母稱長樂宮故有長信少府長樂少府及職吏皆宦者為之又置虎賁羽林衛

士起宮室分鉅鹿九縣爲后湯沐邑

靈帝母曰孝仁董皇后后河間人也爲解瀆侯萇夫
人生帝帝即位卽尊萇爲孝仁皇陵曰慎陵以后爲
慎園貴人及竇氏誅帝使中嘗侍迎貴人兄寵到京
師上尊號曰孝仁皇后居南宮嘉德殿宮稱永樂

景平四年以冲帝母虞大家爲憲陵貴人質帝母陳
夫人爲渤海孝王妃先是梁冀秉政虞氏抑而不登
但稱大家而已陳夫人亦以梁氏故榮寵不及焉時
小黃門趙祐議郎畢整上言春秋之義母以子貴隆
漢盛典尊崇母氏凡在外戚莫不加寵今冲帝母虞

大家質帝母陳夫人皆誕生聖皇而未有稱號夫臣
子雖賤尚有追贈之典況二母見在不蒙崇顯之次
無以述尊先世垂示後嗣也帝感其心乃拜焉

魏文帝初卽王位尊母卞氏爲王太后及踐阼尊后
曰皇太后稱永壽宮

明帝卽位尊卞太后曰太皇太后郭皇后曰皇太后
稱永安宮

齊王嗣位尊明元郭皇后曰皇太后稱永寧宮

陳留王燕王旦之子景元元年十一月燕王上表賀
冬至稱臣詔曰古之王者或有所不臣王將宜依此

義表不稱臣乎又當爲報天後太宗者降其私親況所繼者重邪若便同之臣妾亦情所未安其皆依禮典陛下稽得期運撫臨萬國紹太宗之重隆三祖之基伏惟燕王體尊戚屬正位藩服躬秉虔肅率蹈恭德以先萬國其于正典闡濟太順所不得制聖朝誠宜崇以非嘗之制命以不臣之禮臣等平議以爲燕王表章可聽如舊式中詔所施或存好問準之義類則宴覲之族也可少順聖敬嘉崇義備示不敢斥宜曰皇帝敬問太王侍御至於制書國之正典朝廷所以辨章公制宣昭軌儀於天下者也宜循法故曰制

詔燕王凡詔命制書奏事上書諸稱燕王者可皆上平其非宗廟助祭之事皆不得稱王名奏事上書文書及吏民皆不得觸王諱以彰殊禮加于群后上遵王典尊祖之制俯順聖敬烝烝之心二者不愆禮實宜之普告施行

晉武帝以魏咸熙二年卽位尊母太妃王氏曰皇太后宮曰崇化初置宮卿重選其職以太嘗諸葛緒爲衛尉太僕劉源爲太僕宗正曹楷爲少府

泰始二年以景皇帝夫人羊氏居弘訓宮號弘訓太后

惠帝太熙元年四月即位尊武皇帝皇后楊氏曰皇太后

明帝母荀氏元帝宮人及帝即位封建安君別立第宅太寧元年帝迎還臺內供奉隆厚及成帝立尊重同於太后

哀帝即位尊康帝皇后褚氏曰皇太后居崇德宮

哀帝即位詔有司議母貴人周氏位號太尉桓溫議宜稱夫人尚書僕射江霏議應曰太夫人詔崇爲皇太妃儀服與太后同又詔朝臣不爲太妃敬合禮典不太嘗江適議位號不極不應盡敬

簡文帝即位尊褚太后曰崇德太后

孝文帝即位尊母李氏爲淑妃太元三年進爲貴人九年又進爲夫人十二年加爲皇太妃儀服一同太后十九年尊爲皇太后稱崇訓宮

安帝隆安元年二月尊皇太后李氏爲太皇太后

後魏獻文即位尊文成皇后馮氏爲皇太后

孝文帝即位尊馮太后曰太皇太后

孝明帝即位尊宣武皇后高氏爲皇太后又尊所生母胡氏爲皇太妃後又尊爲太后

後周武帝即位尊母叱奴氏爲皇太后又尊愍帝后

元氏為孝愍皇后先是愍帝被廢后出俗為尼至是尊焉

宣帝即位尊愍帝阿史郡皇后為天元上皇太后又尊所生母李氏為天元聖皇太后

靜帝受禪尊天元皇太后為天元上皇太后天皇太后李氏曰天元聖皇太后又立宣帝天元皇湯氏為天元太皇后又尊所生母天元后朱氏為天元太后天后皇后元氏為天后太皇后天元皇后陳氏為天元太皇后

唐中宗神龍元年正月即位上天后尊號為則天大

聖

六月以時屬炎暑恐則天皇后勞于臨御遂罷十日一外朝更以朔望為嘗儀

玄宗開元四年正月戊寅朔帝御正殿受朝賀禮畢親朝太上皇於西宮

肅宗時太上皇居興慶宮每日問安寢門聖皇亦時至大明宮問皇帝及太上皇移於內地更選後宮為聖皇所愛者百餘人赴西宮備灑掃又令萬安咸宜二長公主入侍養服御饌食窮以珍奇加于嘗日皇帝問安如舊

憲宗永貞二年春正月庚子朔帝率百寮於興慶宮
奉冊上太皇尊號

事在尊
號門

元和元年三月乙丑中書門下上表請尊太上皇后
王氏為皇太后詔依

穆宗以元和十五年正月即位帝母憲宗貴妃郭氏

是年閏月乙卯詔曰朕光膺寶曆正位宸居太行皇

帝貴妃尊冠六宮母臨萬國謹上尊號曰皇太后

敬宗寶曆二年十二月戊申始聽政尊皇太后曰太

皇太后聖母王氏為皇太后

文宗即位尊聖母蕭氏為皇太后

太和元年五月壬戌朔帝赴興慶宮起居太皇太后

宗正卿李銳率諸宗屬詣右銀臺門進名起居丙寅

帝赴興慶宮上壽內外端午進獻如嘗歲

四年四月以有司貢新瓜獻赴興慶宮奉太皇太后

及皇太后并分賜十宅諸王已下初有司以帝命送

諸宮時歲餼味雖太后之尊一槩以賜為名帝始即

位嘗因內園進櫻桃將以賜三宮太后帝曰焉可以

為賜因授筆易其文簿曰奉太后自是以為嘗

十一月己亥日南至帝繇複道謁太皇太后寶曆太

后于興慶宮

五年正月庚子朔以陰雨連旬罷元會之禮帝復道朝賀太皇太后于興慶宮

六年正月乙未朔以父雩廢元會帝赴興慶宮起居太皇太后義安太后

宣宗即位尊母郭氏爲皇太后

僖宗即位尊聖母王氏爲皇太后

哀帝二年五月有司修皇太后宮畢中書奏皇太后慈惠臨人寬仁馭物景叶倪天之兆克彰誕聖之符今輪奐新宮規模舊典崇訓既徵於信史積善宜顯於昌期太后宮請以積善爲名從之

後唐莊宗即位尊母曹氏曰皇太后又冊武皇夫人劉氏爲太妃同光中詔曰皇太后母儀天下子視群生當別建宮闈顯標名號冀因稱謂益表尊嚴宜以長壽宮爲名

三年正月甲午朔皇太后生辰帝御嘉慶殿召諸王家宴極歡而罷

閔帝即位尊明宗皇后曹氏曰皇太后又冊王氏爲皇太妃

晉少帝嗣位冊高祖皇后李氏爲皇太后尊母王氏爲皇太妃

漢隱帝即位尊高祖皇后李氏為皇太后

尊師

周禮師氏以媿詔王傳曰詔於天子無北面又曰當其為師則弗臣然則尊賢貴德承師問道屈萬乘之重明五學之義上以達經國之要下以得化人之本是知尊師重傳則法度存雖曰聖人必繇學也嚴恭之道於是在焉若乃尊其爵位委以樞要厚師臣之遇執弟子之禮或不名以示恩或乞言以敦教生則優其奉祿歿則蒙其渥澤至於幸第以存問變服以臨弔皆所以成主善之美繇諮德之旨誠帝者之懿

範也故曰雖天子必有尊也斯之謂歟

神農師悉謂

悉姓謂各

黃帝師大撓

大撓作甲子者

一云學乎太真

顓頊師伯夷父一云學乎太真

帝嚳師伯招一云學乎赤松子

帝堯師子州支父一云學乎尹壽

帝舜師許由一云學乎務成跗

夏禹師大成摯一云學乎西王國

商湯師小臣

即伊尹

一云學乎威子伯

高宗學先王之道於甘盤

甘盤賢臣有道德者

矣以漁釣于西伯事具宰輔佐命門西伯與語大說曰有吾

先君太公曰當有聖適周以興子真是邪吾太公望

子父矣故號之曰太公望立為師一云學乎錫疇子

斯武王欲修文王業東伐以觀諸侯集師行師尚父公太

望也師之尚之父之故曰師及踐阼詔師尚父而問

焉曰昔黃帝顓頊之道存乎意亦忽不可得見與師

尚父曰在丹書王欲問之則齊矣王齊三日端冕師

尚父亦端冕奉書而入負屏而立王下壇南面而立

師尚父曰先王之道不北面王行西折而南東面而

立師尚父西面道書之言

成王以周公為太師公薨成王葬於畢不敢臣周公故使近文王

墓之

漢昭帝時光祿大夫給事中蔡義以韓詩進授帝數

歲拜為少府遷御史大夫代楊敞為丞相封陽平侯

義為丞相年八十餘短小無鬚眉貌似老嫗行步俛

僂即俯字也嘗兩吏扶夾乃能行時大將軍霍光秉政議

者或言光置宰相不選賢苟用可顯制者顯與光同聞

之謂侍中丞右及官屬曰以為人主師當為宰相何

謂云云

云云衆語謂有不選賢之言也

此語不可使天下聞也又韋

賢為博士給事中以詩進授帝稍遷光祿大夫詹事至大鴻臚宣帝即位以先帝師甚見尊重

元帝為太子時孔霸以太中大夫以選授皇太子經遷詹事高密相

是時諸侯王相在郡守上

帝即位徵霸以師賜爵

關內侯食邑八百戶號褒成君

為帝師教今成君

給事

中加賜黃金二百斤第一區徒名數于長安及薨帝素服臨弔者再至賜東園秘器錢帛策贈以列侯禮

諡曰烈君

初元中制詔御史曰國之將興尊師而重傳故前將

軍望之

蕭

傳朕八年道以經術厥功茂焉其賜望之

爵關內侯食邑六百戶給事中朝朔望坐次將軍

周堪初為太子少傅及帝即位堪為光祿大夫與蕭望之並領尚書事

歐陽地餘初為元帝太子中庶子授經後為博士論

石渠及帝即位侍中貴幸至少府

成帝為太子時張禹鄭寬中皆授經於帝及即位以

師錫爵關內侯寬中食邑八百戶禹六百戶拜為諸

史光祿大夫秩中二千石給事中領尚書事

建始中鄭寬中卒谷永上疏曰臣聞聖王尊師傳褒

賢雋顯有功生則致其爵死則異其禮諡者周公薨以變禮而當天心

周公死成王欲葬之於成周天方雷雨以風盡偃大木斯拔國大思

王乃葬周公于畢示不敢臣也事見尚書大傳而與古文書不同

公叔文子卒衛侯

加以美諡著為後法

公叔文子衛大夫公叔發也文子卒其子請諡於君君曰昔日

衛國凶饑夫子為粥與國之餓者不亦惠乎衛國有難夫子以其死衛寡人不亦貞乎夫子聽衛國之政脩其班制以興四隣交衛國社稷不辱不亦文乎謂夫子貞惠文子近事大司空朱邑

右扶風尹翁歸德茂天年孝宣皇帝愍册厚賜贊命

之臣靡不激揚

贊佐也

關內侯鄭寬中有顏子之美質

包商偃之文學

論語云文學子游子夏商子夏名偃子游名

嚴然總五經

之妙論立師傅之顯位入則鄉唐虞之闕道王法納

乎聖德

闕大也言陳聖王之法聞于天子

出則參冢宰之重職功烈

施手

政事

退食自公私門不開

退食自公召衛羔羊詩之辭書貶退所食之祿

務從至公之道也

散賜九族田畝不益德亂周召中合羔羊

末德登司徒有家臣

司徒掌禮教之臣言寬中學行堪為之也家臣若今諸公國官

及輔佐也

卒然早死尤可悼痛臣愚以為宜加其葬禮賜

之令諡

令善也

以章尊師褒賢顯公之德鴻嘉中張禹

老病乞骸骨帝加優再三廼聽許賜安車駟馬黃金

百斤罷就第以列侯朝朔望位特進見禮如丞相置

從事史五人益封四百戶天子數加賞賜前後數十

萬禹雖家居以特進為天子師國家每有大政必與

定議大將軍王根宮禹寵數毀惡之惡謂言其過惡天子愈益敬厚禹每病輒以起居問謂其食飲寢臥之增損車駕自臨問之帝親拜禹牀下

平帝年幼選署師友大司徒孔光以明經高行為孔氏師京兆尹金欽以家世忠孝為金氏友

後漢明帝為太子時桓榮以少傅授太子經學及即位尊榮以師禮甚為親重拜二子為郎榮年踰八十自以衰老數上書乞身輒加賞賜乘輿幸太嘗府令榮坐東面設几杖會百官驃騎將軍東平王蒼以下及榮門生數百人天子親自執業每言輒曰太師

在是既罷悉以大官供具賜大嘗家其恩禮若此永平二年三雍初成拜榮為五更每大射養老禮畢帝輒引榮及弟子升堂執經自為辨說乃封榮為關內侯食邑五千戶榮每疾病輒遣使者存問大官大醫相望於道及篤上疏謝恩讓還爵土帝幸其家問起居入街下車擁經而前撫榮垂涕賜以沐茵帷帳刀劍衣被良久乃去自是諸侯將軍大夫問疾者不敢復乘車到門皆拜牀下榮卒帝親自變服臨喪送葬賜冢塋于首山之陽除兄子二人補四百石其講生八人補二百石其餘門徒多至公卿

五年以侍中右中郎將包咸爲大鴻臚咸建武中以郎中入授皇太子論語又爲其章句拜諫議大夫帝卽位每進見賜以几杖入朝不趨贊事不名經傳有疑輒遣小黃門就舍卽問帝以咸有師傅恩而素清苦嘗特賞賜珍玩束帛奉祿增於卿咸皆散與諸生之貧者病篤帝親輦駕臨視

章帝爲太子時張酺侍講及卽位出爲東郡太守元和二年東巡狩幸東郡引酺及門生并郡縣掾史並會庭中帝先備弟子之義使酺講尚書一篇然後脩君臣之禮賞賜殊特莫不沾洽

魏高貴鄉公幸大學命大管王祥爲三老祥南面几杖以師道自居天子北面乞言祥陳明王聖帝君臣政化之要以訓之聞者莫不砥礪

晉明帝卽位以東宮時師傅猶宜盡敬乃下詔曰朕以不德風遭閔凶猥以眇身託于王公之上哀筮在疚靡所諮仰憂懷惴惴如臨于谷孔子有云故雖天子必有尊也朕將祇奉先師之禮以諮有德大宰西陽王名秩尊望重在貴恩降丞相武昌公王司空卽王丘子王體道高邈勲德兼備先帝執友朕之師傅太嘗安陽侯訓保朕躬忠肅篤誠夫崇親尊賢先帝所

重朕見四君及書疏儀體一如東宮故事

後魏明帝在藩邸時梁越以上大夫授諸皇子經書及
卽阼以師傅之恩賜爵祝阿侯

大武爲監國時盧醜以篤學博聞授經後以師傅舊
恩賜爵濟陰公

宣武爲太子時孫惠蔚侍講東宮及卽位之後仍在
左右敷訓經典延昌二年追賞侍講之勞封棗彊縣
開國男食邑三百戶

後周武帝少嘗受業於盧光及卽位以光爲陝州總
管府州長史卒贈賻有加嘗典贈太子少保

唐玄宗爲太子時褚無量以國子祭酒侍讀及卽位
加右散騎常侍與秘書監兼昭文館學士馬懷素同
爲侍讀每次閣門則令乘肩輿以進上居別館以路
遠則命宮中乘馬或親自送迎以申師資之禮開元
六年懷素卒帝爲之舉哀廢朝一日贈潤州刺史物
三百段米粟二百石喪事所需並官給八年褚無量
卒帝震悼久之謂宰相宋璟蘇頌等曰無量碩儒且
有德業朕早所帥習每用尊崇三史九經前言往行
卽可以裨益時政規正朕躬未嘗不造膝切論所聞
其屬纊之時難以脩書爲儀永念其逝實軫予懷庶

事宜皆優厚

德宗居春宮張涉為侍讀及即位之夕召涉入宮庶政小大皆咨之恩禮甚崇多所弘益

尊乳保

禮曰國君世子生三日卜士之妻大夫之妾使食之又曰擇於諸母與可者必求其寬裕慈惠溫良恭敬謹而寡言者次為保母皆居子室蓋所以資保阿之力育端聖之體如涓城淮陽厥功茂焉厚賞其子錫之公田亦無爽古三年勞賜之意也降及東漢其禮益厚元魏之世至有借母后之號濫陵寢之名者亦

已甚乎故當以義斷恩以禮制事而取厥中焉

漢武帝少時東武侯母嘗養帝帝後號之曰大乳母率一月再朝朝奏暮入有詔使幸臣馬游卿以帛五十疋賜乳母又奉飲殮養乳母乳母上書曰某所有公田願得假倩之帝曰乳母欲得之乎以賜乳母乳母所言未嘗不聽有詔得令乳母乘車行馳道中當此之時公卿大臣皆敬重乳母乳母家子孫奴從者橫暴長安當道掣頓人車馬奪人衣服聞於中不忍寘之法有司請徙乳母家室處之於邊奏可即入見辭去時有所幸倡郭舍人疾言罵之曰啗老女子何

不疾行陛下已壯矣寧尚須汝乳而活邪帝悲下乃下詔止無徙乳母

宣帝生數日以武帝曾孫坐衛太子事繫郡邸獄故廷尉監丙吉知太子無事實重哀曾孫無辜擇謹厚

女徒令保養曾孫置間燥處問寬爭也燥高敞也吉治巫蠱事

連歲不決曾孫病幾不全者數焉吉數救保養乳母

加致醫藥視遇甚有恩惠及帝即位吉絕口不道前

恩地節三年掖庭宮婢則則婢名也史失其姓令民夫上書自

陳有阿保之功謂未為宮婢時有舊夫在民間辭引吉吉謂則曰汝

嘗坐養皇曾孫不謹督管汝安得有功督謂視察之獨渭

城胡組淮陽郭微卿有恩耳分別奏組等供養勞苦

伏詔吉求組微卿已死有子孫皆受厚賞詔免則為

庶人賜錢十萬

後漢安帝封乳母王聖為野王君聖因保養之勤緣恩放恣女伯榮出

入宮掖傳通奸豔司徒震上疏曰臣聞聖以得賢為

本禮以去穢為務是以唐虞俊乂在官四凶流放天

下咸服以致雍熙方今九德未敘嬖佞充庭阿母王

聖出自賤微得遷千載奉養聖躬雖有推燥居濕之

勤前後賞惠報過勞苦而無厭之心不知紀極外交

屬託擾亂天下損辱清朝玷於日月書戒牝雞晨鳴

詩刺哲婦喪國昔鄭莊公從母氏之欲恣驕弟之情

幾至危國然後加討春秋貶之以為失教夫女子小

人近之喜遠之怨實為難養易口無攸遂在中饋吉

伯榮莫使往來令恩德兩隆上下俱美惟陛下絕婉

嬖之私割不忍之心留神萬機戒慎拜爵減省獻御

尊乳保

損節徵發令野無鳩鳴之歡朝無小明之悔大東不與於今勞止不怨於下追踪往古比德哲王豈不休哉奏入帝以示阿母等內倖皆懷忿恚餘具宰輔諫諍門

順帝封乳母宋娥為山陽君邑五千戶初帝自太子

廢為濟陰王娥與黃門孫承程等共議立帝帝後以

娥前有謀遂封之

靈帝封乳母趙媯為平氏君

其後蔡邕上疏曰前者乳母趙媯貴重天下生

則貲藏侷於天府死則丘墓踰於園陵兩子受封兄弟典郡疏具諫臣直諫門

晉元帝中興乳母阿蘇有乳保之功賜號保聖君

成帝以乳保母周氏有阿保之勞欲假其名號內外皆奉詔侍中顧和獨上疏以為周氏保佑聖躬不遺

其勲第舍供給擬於戚屬恩澤所加已為過隆若假

名號記籍未見明此惟漢靈帝以乳母趙媯為平氏

君此末代之私恩非先代之令典若君舉必書將靴

物垂則書而不法後嗣何觀帝從之

後魏太武始光二年尊保母竇氏曰保太后延和元

年尊為皇太后初竇氏以夫家坐事與二女俱入宮

操行純備進退以禮明元命為帝保母性仁慈帝感

其恩訓奉養不異所生既尊為皇太后又封其弟偏

頭為遼東王竇氏訓整內外甚有稱聲性恬素寡欲

喜怒不形於色好揚人之善隱人之過帝征涼州蠕

蠕吳提入寇太后命諸將擊走之太平真君元年詔
太保盧魯元監護喪事天下大臨三日謚曰惠葬崑
山從后意也初后嘗登崑山顧謂左右曰吾母養帝
躬敬神而愛人若死而不滅必不可爲賤鬼然於先
朝本無位次不可違禮以從園陵此山之上可以終
託故葬焉別立后寢廟於崑山建碑頌德

文成帝初立尊保母嘗氏爲保太后興安二年三月
尊爲皇太后嘗氏本遼西人因事入宮乳帝有劬勞
保護之功累尊爲皇太后其兄英字世華自肥如令
超爲散騎嘗侍鎮軍大將軍贈爵遼西公弟喜拜鎮

東大將軍祠曹尚書帶方公三妹皆封縣君妹夫王
賂爲平州刺史遼東公追贈英祖父符監扶風太守
該爲征西將軍遼西蘭陵公父渤海太守澄爲侍中
征東大將軍太宰遼西獻王英母許氏爲博陵郡君
遣兼太嘗盧度世持節改葬獻王於遼西樹碑立廟
置守冢百家大安初英爲侍中征東大將軍太宰進
爵爲王喜左光祿大夫改封燕郡從兄泰爲安東將
軍朝鮮侯訖子伯夫散騎嘗侍選部尚書子員金部
尚書喜子振太子庶子三年英領大師評尚書事內
都大官伏寶泰等州刺史五年詔以太后母宋氏爲

遼西王妃和平元年喜爲雒州刺史初英事宋不能
謹而賭奉宋甚至就食於和龍無車牛宋疲不進賭
負家於笈至是宋於英等薄不如賭之篤謂太后曰
何不王賭而黜英太后曰英爲長兄門戶主也家內
小小不順何足追計賭雖盡力故是他姓奈何居英
上本州郡公亦是報耳大安中英爲平州刺史訢爲
幽州刺史伯夫進爵范陽公英濁貨徙燬燿諸嘗自
與公及至是皆以親疏受爵賜田宅時爲隆盛後伯
夫爲雒州刺史以贓汙欺妄徵斬於京師和平葬於
廣寧磨笄山俗謂之鷄鳴山太后遺意也諡曰昭天

下大臨三日依惠太后故事別立寢廟置守陵二百
家樹碑頌德

唐中宗神龍元年封乳母子氏爲平恩郡夫人

玄宗先天二年五月太上皇誥曰皇帝乳母蔣氏莫
氏等行籍柔良心惟靜順襁褓祗事夙効於勤勞并
邑分封宜申於寵命蔣氏可封吳國夫人莫氏可封
燕國夫人是歲九月詔曰燕國夫人竇氏慈慧和順
掌執禮經女憲母師獨高柔則朕在孩幼躬勞乳養
遠惟恩義寧忘夙昔瞻既往而莫追見如存而永慕
撫渭城之事未足爲言視南陽之書益增其感俾錫

朝寵微申朕懷俸料祿課等一准職事三品給

代宗大曆八年六月勅曰古者緣情立禮著慈母之

制蓋聖人示德無不報之禮而漢宣帝亦追祿掖庭

郡邸嘗有阿保之勤以功深淺並授封賞記于前典

歷代是之故妳婆元氏朕在襁褓受其撫育推乾就

濕慈愛特深可謂仁人厚惠茂德者矣可贈潁川郡

太夫人

憲宗元和五年十月贈保母盧氏為燕國夫人

哀帝天祐二年九月勅妳婆楊氏可封昭儀妳婆王

氏可封郡夫人弟二妳婆王氏先昭宗皇帝封郡夫

人今准楊氏例改封

中書門下奏曰伏以妳婆楊氏等保持夙宵善養勞苦且隆恩

澤以報勤劬竊以事體參詳合陳管見臣聞周制官

職夫人只列三人漢氏後宮之號十有四位元帝時

置昭儀位視丞秩比諸侯王至於列妾縱稱夫人亦

無裂土割郡之號以乳母郭微卿胡維著保養宣帝

之功後子孫只受厚賞而無封爵之號且帝外祖母

封博平君非乳母之例後漢順帝封阿母宋氏為山

陽君則致漢陽地震安帝時封乳母王聖為野王君

亦致地震京師其時中正上言亦以封爵過當乃貽

厥咎非叶高祖山河之約至晉室中興乳母阿蘇有

保元帝之功賜號保帝聖君既非爵邑又彰其功爰

擇美名在理甚當至高齊陸令宣以乾阿妳授封郡

君尋亂制度中宗神龍元年封乳母子氏為平恩郡

夫人景龍四年封尚食高氏為脩國夫人封爵之失

始自于此後睿宗下詔封玄宗乳母莫氏為夫人竊

以中宗朝政歸韋氏睿宗朝駕躡軒轅當時無復紀

綱歷載寢為說弊伏以陛下重興寶運再闡丕圖奉

高祖太宗之舊行往代前賢故事克臻至道以顯中

興庶彙提綱衆務畢舉今者進封保母為郡夫人再

至加恩須至封國夫人竊以婦人無爵從夫之爵以賞功勳則命爵又四方多事方注意公卿以勳勞昭著者宰家爵邑自郡夫人今則宣授乳母為郡夫人加恩必及列土朝廷大柄以爵祿為主命爵不定其等差則天下之人無以為貴以為貴功則封比礪山榮室則爵同乳母臣等竊意有室家者實恥之况四海九州之內有功勞安社稷勳賢得不對室家慙於所命之爵其所封乳母楊氏王氏臣等參詳望賜釐革雖居濕推燥畢彰保養之勤但胙土分茅且異疏封之例况昭儀內侍燕寢位列宮嬪夫人則亞列妃嬪供奉左右竊按儀禮乳母總以其名母方有總服今則不可以嬪御之號增榮於阿保揆于禮文有乖事體宜加眷佑當樹鴻私永示規程以服寰宇臣等商量妳婆楊氏望賜號安聖君妳婆王氏望賜號福聖君第二妳婆王氏望賜號廉聖君從之

周太祖廣順二年九月癸未制敦敘九族紉綏六親生者錫其寵臨沒者優其追贈哲王茂典歷代芳規

故南陽郡韓氏婉淑居貞賢明垂範奉嬪率禮興家道於仁孝之基諸母推恩撫朕躬於幼冲之歲朝露溘先而奚速慶雲華陰以彌高宜洽明恩追崇大國式是載揚之美寧攄欲報之情庶俾後昆永覃清懿噫嘻貞魄享此儀章可追封楚國太夫人太祖孩幼而孤楚國撫視教道有恩故有是命

